

ASO LULU, 25 IANUARI 2017

Na nofoia le Nofoa e le Fofoga Fetalai i le itula e 9.00 i le taeao.

Tatalo.

FOFOGA FETALAI: Ou te faasilasila atu ua toe amatalia Taulumaga o Fonotaga a le Fono Aoao Faitulafono. Malo le lagi e mama faafetai foi le soifua manuia i le paia o le Palemene i lau Afioga i le Palemia faapea foi le Sui Palemia ma le mamalu o le Kapeneta, e faapea foi Minisita Lagolago, aemaise o le afifio o lea itu o le Maota i le paia i Taitaifono ma Komiti Filifilia a le Palemene ma sui usufono o le Maota. E faapea foi le nofo tapuai mai a Ofisa Sili o Pulega ma Pule Sili o Matagaluega ma Faalapotopotoga a le Malo, aemaise foi o le Failautusi ma le Ofisa o le Fono ae a le tapuaiga a Samoa. Malo faafetai le tauatai i lenei taeao.

**LAFO A LE TAITAIFONO O LE KOMITI FAA-PALEMENE E
TALOSAGAINA AI SE FAATAGAGA**

Afioga ALIHMALAMANU ALOFA TUUAU (Taitaifono Komiti o Tupe Maua ma Tupe Totogi): E faatalofa atu i lau Afioga i le Fofoga Fetalai faapea sui usufono mamalu uma o le Palemene ma Samoa ua potopoto mai ma Samoa faafofoga tapuai mai.

Lau Afioga i le Fofoga Fetalai ou te faatu le lafo, *Ina ia tuuina mai e le Fono Aoao se faatagaga e faaopoopo ai le taimi e iloiloaina ai le Tulafono Tau Faaofi o Totogifuapauina ma Tau Faaee atu (Teuteuga Eseeese) 2016 sa tuuina mai i lenei Komiti ona e le i maea atoatoa ana iloiloga ma lipoti mai ai i le Fono Aoao i le Fonotaga o Mati 2017.*

Faaluaina e le sui usufono mo Faasaleleaga Nu.1 i Sisifo.

Na faamaonia le lafo.

**TULAFONO TAU FAAOFI O TEUTEUGA O LE FAAVAE (NU.1)
2016 – faitauga faalua**

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Faavae (Nu. 1) 2016 i lona faitauga faalua ma ou te fia tautala faamalamalama i ai.*

Faaluaina e le Minista mo Pisinisi, Alamanuia ma Leipa ma le Minisita mo le Soifua Maloloina.

25 IANUARI 2017

**Tulafono Tau Faaofi o Teuteuga o le Faavae (Nu.1) 2016
– faitauga faalua**

FOFOGA FETALAI: Ma lou faaloalo ou te tapa lau Afioga i le Palemia mo lau saunoaga faamalamalama.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai o le sini autu o le Tulafono Tau Faaofi o le soloia lea o le Mataupu 41(a) o le Faavae o le Malo Tutoatasi o Samoa 1960 ia mafai ona aveesea le tofiga faale-Faavae o le Faatonu e faafoeina moliaga tau solitulafono. O le Tulafono Tau Faaofi o le a faapea foi ona teuteu ai le Mataupu 41 ina ia toe faafoi i le Loia Sili ona malosiaga e faafoe ai moliaga tau solitulafono. O lenei faaiuga na faia i luga o le talitonuga maumaututu o le Malo i lena foi vaitaimi e faapea ua lava tapena Samoa mo le faatuina o se Ofisa fou e faafoeina moliaga tau solitulafono. Peitai, e i ai ni mataupu i na tausaga e ono tauaveina ai e le Loia Sili se tulaga tutoatasi i tiute tau faafoeina o moliaga tau solitulafono. O le tulai mai la o faafitauli lata mai nei talu ona faatuina le Ofisa e faafoeina moliaga tau solitulafono, o lea ua manatu ai le Malo ina ia toe foi lava i le faiga sa i ai muamua. O lona uiga e toe tauave pea e le Loia Sili le matafaioi o le faafoeina o moliaga tau solitulafono, lea o le a faatino e pei ona sa i ai muamua i le tulaga tutoatasi ma e aunoa ma le faalavelaveina.

Lau Afioga o le agaga tonu lena, o le itu e faataua e faavae ai lenei Teuteuga ona o le talitonuga maumauai o le isi laasaga maualuga lea ua tataua ona tatou laa i ai e aunoa ma le iloa o le a tele ai ni faafitauli e tulai mai ai ma toe tupu ae ai le manatu e lelei ona toe foi ia i le mea sa i ai. O le uiga lava lea o le tele o Tulafono tatou te faia nei i luga o le taimi e faatalanoa ai e tele itu lelei e mataitu, ae leai ni itu faaletonu o iloa. Ae a oo loa ina faagasolo, ia e tatou te le iloa mafauaoga o tagata e oso ese mai ai ma manatu fou e mau ai i le Tulafono. Ma e le mafai ona galo ia te au le vevesi na i ai i le tausaga e 1982 ina ua uma le Faiga Palota. E matua maoae lava le vevesi na i ai le Malo i le taimi lena ona ua mautinoa ua toatele tagata palota ua palota ae ua leva ona feoti. O lona uiga ua faaoga e Komiti a sui faatutu igoa o i latou ua leva ona feoti e palota ai ma sao mai ai ma manumalo i le Faiga Palota. O le ala lena na matua maumauai ai le finagalo o le Kapeneta i lena vaitaimi o le fofoga lea o le a fofoga ai na solitulafono. O le fofoga o le fai loa mo se uluai taimi mea nei o Ids e te alu atu ai ma lou ata ma iloa ai o oe lava lea e tu mai lou igoa i totonu, e aunoa ma le iloa o le a tulai mai ai ma le anoano o uiga faatevolo. O uiga ia faatevolo ua le toe fia omai ai ma tagata palota e omai e palota ae faatalitali mai e o atu sui tauva e talau mai latou.

Lau Afioga i le Fofoga Fetalai, o i ina na amata mai ai le anoano o uiga matautia ia e tupu nei ae mama le agaga na fai ai le Tulafono. E faapena foi la pei o le Tulafono Tau Faaofi lea. E le tasi ae tele nai Tulafono tatou te faufauina e fofoga ai faafitauli e tulai ae faatoa iloa ina ua pasi o lo o i ai nai faaletonu. Ia ma o le mea lava e tataua o le vave loa ona toe sui agai i tua le kia o le taavale ae le i oo atu i le faaletonu. Ia lau Afioga i le Fofoga Fetalai, o le faamatalaga puupuu lena o lenei foi Teuteuga o le tatou Faavae.

25 IANUARI 2017

**Tulafono Tau Faaofi o Teuteuga o le Faavae (Nu.1) 2016
– faitauga faalua**

FOFOGA FETALAI: Malo faafetai. Ia ua manino ma malamalama le autu ma le agaga tonu o le faamoemoe o le Malo, ia ma o le taimi foi lenei o tatou felafolafaoga.

O le mea lea ou te tapa lau Afioga i le sui usufono mo Salega Sasae e tulai mai e te saunoa e tusa ai o lenei mataupu.

Tofa OLO FITI AFOA VAAI (Salega Sasae): Faafetai i lau Afioga i le Fofoga Fetalai mo le avanoa. A o le i avatua se vaivaiga o lenei itumalo lau Afioga, e faapena foi ona matou piama i le taulaga sa e siitia i le taeao aua foi le alofa ma le agalelei o lo tatou Atua ua taitaia mai ai lou soifua faapena foi le mamalu o le Palemene nei i lenei taeao fou aua le faaauauina o le tatou galuega.

Lau Afioga i le Fofoga Fetalai masalo o le mataupu lenei e le i leva ona tatou suia le Faavae i le mea o lo o i ai nei a o lea ua tatou toe foi i tua. E lagolagoina e lou sui usufono so o se faiga faavae ma ni fesuiaiga e faatulai mai e le tatou Malo aua e pei o le Afioga i le Palemia ma le Kapeneta o lo o nafa ma le faafoeina o tiute tauave o tatou tagata galulue i totonu o le tatou Malo. Na pau lava o lea lau Afioga i le Fofoga Fetalai, sa faapea e le o le taimi lenei e oo ai se tatou faaiuga faapea i le toe suia o le Faavae ma toe tuu i le mea na i ai, ona e i ai le vaivaiga o lenei itumalo. O le mea o lo o i ai nei o se mea e alagatau le faatutoatasi o se Loia e tauavea moliaga.

Ae peitai lau Afioga i le Fofoga Fetalai, ia o lea ua toe tuu i tua. O le popolega lau Afioga, o le Afioga i le Loia Sili o ia o le advisor po o le faufautua a le Malo a o lea la o le a toe avatu i ai ma le faaululuga, le Prosecution, e i ai la lou popolega. Se i avatu a sau faataitaiga lau Afioga i le Fofoga Fetalai ma le mamalu o le Maota, afai nei e solitulafono se Minisita vaeatu lo outou paia o se faataitaiga lea, ona o le fautuaga a le Loia Sili, o le fesili, o ai e faia le moliaga? O le tali e toe fai lava e le Loia Sili le moliaga. O le itu lena lau Afioga i le Fofoga Fetalai e tau popoe ai le agaga i le toe faatulai mai ma le toe tuu i tua....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai o se mea e fia faasao.

FOFOGA FETALAI: Ia malie le sui usufono mamalu, se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E le faia e le Loia Sili ae aumai se Loia mai fafo na te faia. E le mafai ona sao se mea faapena ma ua i ai foi tatou Tulafono e avatu ai isi Loia latou te faatinoina le Faamasinoga. E pei lava foi o le Faamasinoga lea e faagasolo nei.

25 IANUARI 2017

**Tulafono Tau Faaofi o Teuteuga o le Faavae (Nu.1) 2016
– faitauga faalua**

O le isi lea vaega tele na amata mai ai le pisa lea i ai, ona o le Faatonu e fai lava e ia le tulaga foi lea o le puipuia o le Ofisa. Ae na te le faia, e fai foi e le isi foi independent prosecutor. Ae pei la o le tulaga lena lau Afioga e oo lava foi i le lalolagi i le taimi lenei i tulaga masani lea o lo o i ai, o Ofisa tetele tai pei o le Suetusi ma le Ofisa Loia afai lava e tulai mai se mataupu e aafia ai se Loia, e fili le isi Loia na te faia.

Lau Afioga i le Fofoga Fetalai e le o se mea fou le mea lena o le mea ua masani ai Ofisa o Loia, Ofisa foi o le Suetusi ma Ofisa faa-profession e gata mai ai mataupu e faatulai mai ai le tulaga maaleale.

FOFOGA FETALAI: Tulai mai le sui usufono e faaauau le saunoaga.

Tofa OLO FITI AFOA VAAI: E le o toe umi foi. Faafetai i le faamalamalama lea, ae sa i ai le manatu foi lea e moni lava o le a faaoga mai a tatou Loia mai fafo, ae tasi lea cost i luga o le tatou Malo pe a le mafai ona faatino e se Loia o tama fanau a le tatou atunuu. O lou manatu vaivai lau Afioga i le Fofoga Fetalai, o le lape sa feagai ma le tofiaina o le avanoa lenei ona sa tatau lava ona tofia se Loia e mature, e experience. E lava lana tofa e fetalai i le tele o taimi i ni mataupu ogaoga e tulai mai faapea. With all due respect i le tamaitai Loia lea e i ai nei, she's too young, e le lava lona tomai ma lana tofa e fetuunai ai mataupu faapea. Ia a e na o se fautuaga i se taimi o i luma, o ai lava o le a tulai mai, ia tuu i ai se faatoeaina po o se faaloomatua i le mea lea e nafa ma mea faapena. Ia na o nai ou manatu vaivai ma nai motugaafa ae pule lava Sitafune i le la o lona vaa.

Faafetai mo le avanoa.

FOFOGA FETALAI: Faafetai saunoa. Ou te tapa le sui usufono mo Anoamaa Sisifo ona sosoo ai lea ma le sui usufono mo Nuu Tu Taulaga i Sisifo.

Tofa Hon LAUOFO FONOTOE NUAFESILI PIERRE LAUOFO (Anoamaa Sisifo): Faafetai i lau Afioga, e le umi foi se manatu o lenei foi usugafono. Ia e manatu i lenei taeao o lea ua maea ona e molitai le puapua i Fagaitua ma Malotumau e pei o le fetalaiga i le Motumutasi. Ia o lea foi ua maea ona e momoli laau i Fogaa pei o le fetalaiga i Tumu , a o le atumua foi o le taeao na e faamanusina aua se tatou sao ia Manuvao i lenei foi taeao fou. Ia o le matou tala, ia o le faafetai i le Atua ua e siitia e le toe faaitiitia i sa matou gagana.

Ae ou te tulai atu ona o le Teuteuga ua opea nei i le Maota le Teuteuga o le Faavae ia po o le Tulafono Faavae o le atunuu. O le malosiaga po o le paoa lea e faataatia mai i totonu o le Tulafono Toe Teuteu lenei, o le malosiaga e amatalia ai ni moliaga ma le malosiaga e taofia ai le faaauauina o ni moliaga. I lau faitau atu o le tulaga tonu lena o le Teuteuga lenei.

25 IANUARI 2017

**Tulafono Tau Faaofi o Teuteuga o le Faavae (Nu.1) 2016
– faitauga faalua**

O le malosiaga la leni a silasila foi lau Afioga i le Fofoga Fetalai i le Tulafono Faavae o le atunuu sa i ai le malosiaga leni i le Loia Sili mai le amataga ina ua Tutoatasi mai le atunuu i le 1962 seia oo mai i le tausaga 2015 po o le 2014 ina ua pasia ai le Tulafono e faavae ai le Ofisa lea o le National Prosecution Office. Ia e pei ona saunoa le Afioga i le Palemia, na faasee loa lea o le malosiaga lea i le Ofisa lena. Ia o lea la ua aumai le Teuteuga e toe faasee mai le malosiaga lea i le Ofisa o le Loia Sili e pei o le mea sa tatou omai ai i aso o le tele o tausaga ua tuanai po o le amataga foi o le tatou Tutoatasi. O le malosiaga la leni e amatalia ai pe faatoai ai ni moliaga faasolitulafono. O lea la na saunoa se tasi o sui usufono po o le tootoo na mavae atu nei, e pei e agai i le tulaga tonu lea o le tutoatasi, po o se itutino e faaaogaina le malosiaga lea. Atonu e tasi foi lea mafuaaga sa silasila i ai le Loia Sili sa feagai tonu a ma le mataupu leni i le faasee ese mai o le malosiaga lea mai le Ofisa o le Loia Sili. Ona o le tulaga lea e pei sa tau aumai e le sui usufono lea ua mavae atu nei.

O lea la ua tali le Afioga le Palemia i le tulaga lena, ia ou te le toe agai la i ai. Na pau lava le mea, o lea ua tatou toe foi i le mea sa tatou omai ai. O lona uiga la, e leai lava se suiga tele o i ai i lau tilotilo. Na pau lava le mea e pei ona tulai mai i vesiga lea na tulai mai nei, ia atonu e sao foi saunoaga a le sui usufono na se i mavae atu nei, e pei e mafua i mea tau personalities, o tagata sa umia tofi ia, ma latou foi feeseeseaiga i o latou lava va ma o latou talitonuga, ona tulai mai ai lea o le vaega lea.

A o le mea ou te fia taua ai le tulaga lea lau Afioga, e le o aveesea ai le aiatatau a le tagata lava ia e faaulu ai moliaga e faasaga i le isi tagata po o le private prosecution, o le tulaga lena. O lona uiga e po o fea lava le mea e feseetai i ai, o lea lava e i ai le aiatatau lea foi na tulai mai ina ua mavae le tatou Faiga Palota talu ai, e faapea foi isi Faiga Palota i tua atu.

O le faaaogaina la o le power lea e faapea e taofia ai le faaaauuina o ni moliaga, ou te tau manatua e au ia e na o le faatasi lava ona faaaoga le malosiaga lena ina ua tulai mai ua mavae le Faiga Palota 2001, sa i ai la moliaga ia o private prosecutions sa faasaga i nisi foi o sui usufono sa tulai mai i lena vaitau, ia ona faaaoga ai lea o le malosiaga lea e le Loia Sili i lena vaitau. O le tulaga la lea, e le faapea la e faaaoga le malosiaga lea ona otometi lava lea ona taofi o moliaga. E ave lava le talosaga i le faamasinoga, ona iloilo lea e le Faamasinoga o le talosaga pe talia pe teena. Ia o le mea la sa tulai mai i lena vaitau sa talia e le Faamasinoga le talosaga a le Loia Sili ma taofia ai loa le faaaauuina o moliaga sa faasaga i sui usufono i lena foi vaitau. Ia o le tulaga la lena, o lea la ou te tilotilo atu au, e leai se suiga tele e na o le tau faaulu i tua ma le isi itu e le o taofia ai le faauluina o private prosecutions. E oo foi i le faaaogaina o le power e taofia ai le faaaogaina o moliaga o loo i le Faamasinoga lava le faitalia ina ua maea ona iloilo ma faalelei le talosaga e pei ona i ai.

Ia e pei o le tulaga lena lau Afioga i lau tilotilo atu i le Teuteuga leni o lo o tatou talanoa i ai. Faafetai mo le avanoa.

25 IANUARI 2017

**Tulafono Tau Faaofi o Teuteuga o le Faavae (Nu.1) 2016
– faitauga faalua**

FOFOGA FETALAI: Faafetai. Out e tapa lau Afioga i le sui usufono mai le Itumalo Tu Taulaga i Sisifo.

Afioga FAUMUINA ASI PAULI WAYNE FONG (Nuu Tu Taulaga i Sisifo): Faafetai lava i lau Afioga i le Fofoga Fetalai. Faafetai foi i leni taeao ua maua le soifua manuia aemaise le soifua laulelei i lau Afioga le Fofoga Fetalai, aemaise foi le mamalu o sui usufono. Ae o le a taumafai atu se vaivaiga ina faasao le tatou taimi lau Afioga. E fia avatu foi se vaivaiga o leni itumalo e uiga i le Tulafono ona o le faavae o le a suia ai ona o tulaga i ala o feeseeseaiga.

Lau Afioga i le tulai mai o leni feeseeseaiga, e foliga mai ua le galulue faatasi Ofisa e tataua ona galulue ina ia mafai ona maua le sini autu o le Tulafono sa faamautu ai ina ia mafai ona agai i luma. Ia ae pei lava o mea faapenei, a ua alualu i luma ua lelei, faaauau. Ae a faapea ua alualu i luma ua le lelei foi, ia toe tuu.

O le popolega la o leni sui usufono lau Afioga i le Fofoga Fetalai, a faapea o le a avea leni faafitauli o lo o tulai mai foi i le tele o Matagaluega a le Malo feeseeseaiga i le tulaga i lea Matagaluega ma lea Matagaluega e tataua ona gaoioi ma galulue faatasi. A tulai mai la se feeseeseaiga ona popole ai lea o le agaga i le toe sui o le Faavae ma toe sui le Tulafono. Ae i ai le manatu o leni itumalo lau Afioga i le Fofoga fetalai, a toe tulai mai se isi faafitauli, sui latou o lo o i ai i totonuo nei faafitauli ae taatia pea le Tulafono ma le faavae ua uma ona i ai. A o le mea taua, o lea ua uma ona taea foi e se isi sui usufono ua maea ona tulai atu le popolega lena, ae lagolagoina e leni itu tulaga o le suiga o le Faavae i leni mataupu faapitoa, aua e aoga, e avatu foi o se fautuaga ina ia silasila totoa Matagaluega uma lava a le Malo o lo o latou tauaveina Tulafono foi po o galuega na tuuina atu ia te i latou ina ia galulue faatasi. Aua o le iuga lava o leni faamoemoe, o le lelei o le atunuu leni ma lelei lona faamoemoea aemaise lona tamaoaiga. Ae a faapea e tulai atu ae fai lava le finagalo o le tagata ia, e talitonu le agaga, ia taatia le Faavae, taatia le Tulafono ae fai i ai e susu i le fale se i malamalama foi lona mafaufau ona toe susu mai lea e fai lana galuega. Ae faafetaia le Malo ona o le vave faia foi o le fofoga o leni faafitauli aua sa i ai le agaga ua umi tele foi ona fai. O lea ua vave fai ae faafetai o lea ua maua leni avanoa e mafai ai ona tatou faia ni suiga aua foi le lelei o le tulai mai o le Ofisa o le Loia Sili aemaise lava le Ofisa o Leoleo o lo o latou galulue faatasi ma le Ofisa lea ina ia mafai ona maua le sini autu, ae maua ai foi se malamalama lelei. Ia o se manatu vaivai lea lau Afioga le Fofoga Fetalai, faafetai mo le avanoa.

Manuia lava fuafuaga o leni aso.

FOFOGA FETALAI: Malo faafetai saunoa i le sui usufono mamalu. Ma e tapa foi se isi sui usufono e tulai mai e saunoa e tusa ai foi ma le Teuteuga o le Faavae. O lea ua tulai mai le sui usufono mo Anoamaa Sasae.

25 IANUARI 2017

**Tulafono Tau Faaofi o Teuteuga o le Faavae (Nu.1) 2016
– faitauga faalua**

Afioga ALAIASA MOEFAAUO MALAGAITUTOGIAI SEPULONA MOANANU (Anoamaa Sasae): Ua i luma o le Atua le faamua i lenei taeao e tusa ai foi ma le viiga ma le faafetai. Ae maitau atu o lea ua tau leai ni sui usufono o le Itu Agai e tulai mai ae fia fai se manatu puupuu i le Tulafono Tau Faaofi.

O le agaga lava ia o le Tulafono Tau Faaofi ma so o se Tulafono, e ese le lelei ma matagofie. E pei foi la ona i ai le toe suiga ua aumai nei e pei o se fofu alamea i mea ua tulai mai. O lea foi ua saunoa le Palemia, ua avea foi le mea ua tulai mai e toe manatunatu ai i Tulafono ma toe aumai suiga. O uiga lava ia o le matua, e le tuulafoai leaga a lepeti loa le filemu o le atunuu, ia o i ina e manumanu uma i ai aua e mamanu le tavae i ona fulu. A tatou tomanatu la i mea na tutupu, ia ua ou auai i le aumaiga o lenei Tulafono Tau Faaofi. O le mea foi e le o le Tulafono Tau Faaofi e faaletonu ae o lo o tauaveina le Tulafono Tau Faaofi. A tatou vaavaai la i iuga o nei mea aua o lea ua oo i le faaiuga mea nei, sau le faaiuga, solofua, i mea na molia ai e le isi loa ma toe fai le moliaga foi a le isi ma lea foi ua maua le iuga, e solofua. E pei la ia te au i lau vaavaai, e pei e taalo ai ia tagata e ana Tulafono i le faaaogaina o latou malamalamaga ua i ai nei i Tulafono nei ae o la e faafofoga le atunuu, o la e maitau le atunuu, e le gata ia Samoa ae ua alu i fafo, ua aafia ai le igoa o le atunuu i mea nei.

Ia ona matou faapea lea, e matua lagolagoina e lenei itumalo le aumaiga o lenei Tulafono Tau Faaofi ina ia aua ne i toe tulai mai ni mea faapea leaga e le manaia i le faalogo, leaga e le matagofie i le maitau, leaga e i ai e faalele, e i ai foi e maitau. E pei lava ona ou fai atu e pei e na o ni mea pepelo nei mea e fetauai ai nei tagata ae uma aumai faaiuga e soloia, soloia. E leai ni faasalaga. E taalo i iuga o le atunuu ma latou mea ua faatulai mai.

Ia e lagolagoina pe afai e toe tofia ni tagata e vaai nei mea, aumai tagata e i ai agavaa. Aua o le mea lea e tupu nei, o le recruitment process, o i ina lea e leaga ai tatou mea. E toatolu lava toafa e omai fai le faaiuga, ae le silasila la i ona tua e ono tulai mai ai mea faapea.

Ia o se matou soso atu lea ma le agaga faaaloalo i le tatou fonotaga, ae lagolagoina le faamoemoe o lenei Tulafono Tau Faaofi.

Ma le faaaloalo lava, manuia le Fono.

FOFOGA FETALAI: Faafetai. Ia, ua ou manatu e tulai maia le Malo.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, e faamalo i sui usufono e tusa ai foi ma le latou sao i le Teuteuga lenei o le Faavae.

O le mea muamua lau Afioga i le Fofoga Fetalai, o lo o taoto lava a tatou foi tonufai i le filifilia ma le tofia o i latou i tulaga tofi o Faauluuluga o Matagaluega. Ia ma e le mama foi i le Kapeneta le tausisia o ia foi taiala i le faasalalau faalauaitete ma tofia foi le Komiti o laua o laua e latou te faatalanoaina i latou ua lilifa i ai le finagalo o le tagata ua matua.

25 IANUARI 2017

**Tulafono Tau Faaofi o Teuteuga o le Faavae (Nu.1) 2016
– faitauga faalua**

Aemaise a tilotilo foi i le record o le tomai i le galuega lava lea faamoliaga, o le tagata ua leva ma umi ona tautua i totonu o Ofisa, o i ina e faavae ai le fautuaga e sau i totonu o le Kapeneta, ona fale ai lea e le Kapeneta ma fai lana faaiuga. E l mama la i le Kapeneta lana faaiuga fai. Ou te manatua lava le tofiga o le isi Loia Sili ua fai si leva atu, e toafa ea latou na talosaga. Ia ona tilotilo lea i le tagata matua, e tele lona poto masani. Ia o lea foi e aumai ai le fautuaga o le tofi lea. Ua uma ona tofi ae faatoa oo mai le isi loia ma fai mai ia te au, ina ua uma le lua aso talu ona tofi, ÷o e silafia e le i atoa le valu tausaga o tautua le alii lona?ø Ae o mea ia ua uma ona talanoa i ai le panel ma aumai. Ia ona ou aamia lea o le loia, ou fai atu, ÷alii o lea e aumai le lipoti e le i atoa lou valu tausaga.ø Ae fai mai le tala a le loia, ÷se toe lava o nai aso atoa.ø Ou fai atu, ÷oi e leai la, e le talia oe leaga e te le talafeagai ma le Tulafono.ø Ia ona tofi loa lea o le isi loia ua 50 tausaga ua leva ona fai lana practice ae galue la faa-Loia i Niu Sila, o le loia Samoa ua matua lauia lava o lauia. Ona tofi loa lea o lona ae sa ave lava le faatalosaga i le Sosaiete o Loia i Niu Sila, se i aumai lava se tala i le Samoa lea e nofo i le isi aai tele o Niu Sila. Ae e sau le lipoti, o le alii lona o lea e faatali nei lona faamasinoga ma o le tulaga e aliali mai e ono falepuipui ma o lea ua soloia le igoa mai le resitala o loia. Ia ona agai loa lea o le tofiga i le lava e aupito laititi o le vaega uma lea na talosaga, le ituaiga manatu foi lea e laititi e le i taitai. Ae sau le loia lea, o le matua lauia lava o lauia.

Lau Afioga le Fofoga Fetalai, e faapena le tofa fetalai i le faiga o mea o faaiuga. A fai lava... e i ai lava le agaga ina ia tuu i ai tamafanau a le atunuu ua lava taoso. Ae afai lava e tulai mai e i ai ni faafitauli ma faaletonu, o lo o i ai foi auala e mafai ai ona faatino galuega, e ui lava ina faitioina ai foi le Malo i le tele o taimi. Ae o lea ua uma ona sausaunoa sui usufono ma atili malamalama ai foi le mataupu aemaise saunoaga e faasino i le tulaga e leai lava se mea o suia e pei ona avatu. E le o taofia ai foi moliaga e faia e le tagata lava ia, e le tau faalagolago i le Ofisa o le Malo.

Ia o le tulaga maualuga lava e pei ona saunoa se tasi foi o sui usufono, o le mea lea na faavae ai le iuga leaga ua toatele leoleo ua aafia. Aua e relate lava mea ia e lua, e relate agai i le tofiga ma e tataua lava ona matua malupuipuia faaiuga fai a le Malo ia aua ne i tulai mai ni vevesi. E mafai ona faatali, ae a tulai mai ni pefea ona fesili lea o le taofi, e tou te nofonofo, e tou te iloa lava e tuga mataupu e tulai mai? E le o le matou tuualalo o se tuualalo ae o outou lona e i ai le tiute e fai ai faaiuga mo le malupuipuia o Samoa ina ia maua ai le filemu.

Lau Afioga le Fofoga Fetalai, e le i soona mama ma soona fai le faaiuga lenei e sili atu le mao i mea lelei. E sili ai le tatou toe foi lava i le mea na tatou sau ai i lo le alu pea, ae o lea ua vaavaai atu i le faaogaina o le Tulafono lea e tutupu mai ai faalavelave. O le agaga o le Tulafono e lelei ae le mafai ona tatou iloa ni faalavelave e tutupu mai ai. E pei lava foi ona tatou iloa o le mala aupito maoae lava a le lalolagi lenei, o le taua lona lua a le lalolagi.

25 IANUARI 2017

**Tulafono Tau Faaofi o Teuteuga o le Faavae (Nu.1) 2016
– faitauga faalua**

Ae a sue, sue, sue pe faapefea ona oo lenei tagata e igoa ia Hitila i luga, na oo foi i luga i faiga faatemokarasi, na alu lava sao i luga i tulaga o Tulafono. Ia na pai loa i luga, tago loa Hitila aapa loa i le auupega, faaoga le Tulafono, na ona oo atu lava i luga e liliu mai loa amata le taua na feoti ai le toatele o le fia miliona ma miliona o tagata o le lalolagi.

O lona uiga o lea mea, e i ai lava tagata latou te faaogaina le Tulafono e fai ai se mea sese. O le pui puiga lea o lea e taumafai le Malo e fai, vave fai le gaoioiga, a o le i pau atu tatou i se faaletonu. Ma e lelei lava le mao i mea lelei. Lau Afioga o le Teuteuga lena.

FOFOGA FETALAI: Faafetai, ia ma o lea foi ua maea le faamalamalama a le Malo. E maitau atu ma le agaga faaaloalo, e i ai sui usufono sa toe tutulai mai ina ua maea ona tapa le Malo e talifuitau i mea sa laga e sui usufono. Ia e faamanatu ma ou te faamalulu atu i o outou finagalo o le tatou galuega e le faatalia i le telegese ona outou tulai mai e faailoa mai le Fofoga Fetalai ma le Nofoa, o lo o i ai le agaga e fia saunoa e tusa ai o se mataupu. O le mea lea ou te faamalulu atu ai i sui usufono mamalu i a outou Afioga, e le avea lava lo outou ai. Ia ae o lenei foi Tulafono Tau Faaofi, e i ai le faamoemoe e toe tuuina atu i le Komiti mo nisi o a latou iloiloga ae o lo o faagasolo pea le tatou galuega.

Na faamaonia le lafo ma faitauina le Tulafono Tau Faaofi o Teuteuga o le Faavae (Nu.1) 2016 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi o Teuteuga o le Faavae (Nu.1) 2016 i le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae mo le iloiloina ma toe lipoti mai i le Fono Aoao i le tuanai ai o le 90 aso talu ona tuuina atu le Tulafono Tau Faaofi.

**TULAFONO TAU FAAOFI O TEUTEUGA O LE FAAVAE (NU.2)
2016 – faitauga faalua**

FOFOGA FETALAI: Ou te tapa ma le faaaloalo lau Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o le Teuteuga o le Faavae (Nu. 2) 2016 i lona faitauga faalua ma ou te fia tautala faamalamalama i ai.*

Faaluaina e le Minisita mo Aoga, Taaloga ma Aganuu, Minisita mo Pisinisi, Alamanuia ma Leipa ma le Minisita mo Tagata Tafafao Maimoa Mai Fafo.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

FOFOGA FETALAI: Ou te tapa ma le faaaloalo le faamalamalamaga a lau Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, o se tasi o tatou feiloaiga, o sui usufono uma o le Maota leni ina ua tuanai le Faiga Palota ma tatou ofaga potopoto ai, e faatalatalanoa nisi o mataupu e tapena ai i tatou uma i tiute ma tofi o le a feagai ma i tatou, sa tatou talanoaina ai le Faavae, ma o i ina na agai ai manatu i le vaivaiga o lo o i ai i le Faavae. O vaivaiga o lea tatou te lauvivilu, o Samoa o le atunuu o lea e faavae i le talitonuga faakerisiano ma ana tu ma ana agaifanua. Ae o le vaivaiga lea e i ai, e le o i totonu o le tino o le Faavae, o lea e i tua o le faavaa upu na. O lona uiga o le upu tomua, e le o se vaega o le Faavae, ae o lona uiga afai e lagalaga ni mataupu i le lumanai e lagalaga ai le tulaga tau tapuaiga, e leai ma se mea o taua i totonu o le tino o le Faavae. O le mea lena e taua, e matua le faaaogaina lava i lalo o faamasinoga ni manatu e avatu i le faavaa o le Faavae. Ae faapea sa lagalaga i le taimi sa talanoa ai le Faavae le tuu i totonu o le tino o le Faavae o upu nei.

Ia, ae pei e foliga mai i le manatu foi o fautua mai fafo, e leai se mea o le a tuu ai i fua i totonu, aua e le o vevesi le atunuu i ni mataupu tau lotu. O lona uiga, e le o malamalama foi la o tatou tuua i le uiga o lea ua tuu ai i tua o le faavaa, po ua tuu ai i tua i upu tomua, e pei e faasee ai o tatou tuua, o lea ua i ai i totonu, ae le o i totonu o le Faavae.

O le manatu lena sa tatou felafolafoai ai, ma tupu ae ai le manatu i totonu o le Kapeneta, o le Atua, o le Atua na faia mea uma i le lagi ma le lalolagi. Na faia tatou, na Ia aumaia mafaufauga i ai tatou. O lona uiga i le silafaga a le Alii, o taimi uma lava tatou te talanoa ai, o lo o i totonu o le Faavae o Samoa o lo o Faavae i le Atua, ona ataata lea o le Alii ma faapea ane, *'ua oukou faavaleaina a'u'*. Ia ma ua ova i le 50 tausaga talu o tatou faavaleaina pea le Atua, o le Atua o le Faavae, ae le o i totonu o le Faavae.

O le ala lena o lea na tupu ae ai se manatu i le Kapeneta ma le Vaega leni e toa 47 sui usufono, e tataua ona faasao le mea lea ma teuteu le Faavae ma tuu loa i ai upu. O upu la na ua tuu i ai, a taumafai le Tulafono e teuteu le Faavae, o le sini o le Tulafono o le faaofi lea i ai i totonu o le tino o le Faavae e faapea, o Samoa, o se atunuu Kerisiano. E faailoa manino ai le tamauina o le talitonuga faakerisiano i totonu o Samoa. Fuaiupu 1: *'ua aiaia ai ma le igoa puupuu ma le amataga o le Tulafono, o le a amata faamamaluina i le aso e tuuina i ai le maliega a Le Ao o le Malo, ua teuteu ai mataupu muamua o le Faavae, e ala i le faaofiina o le faafuiaiupu 3fou.'* Ia ma o le faafuiaiupu 3fou: *'O Samoa, o se atunuu kerisiano e Faavae i le Atua le Tama, le Alo ma le Agaga Paia.* O upu na o lea ua i totonu o le tino o le Faavae. Ia o le agaga atoa lena.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

E i ai isi na fai mai, sa tatau foi ona tuu i ai ma tu ma agaifanua. Ia ae pei o le agaga foi lele, e le tautaua na mea, aua o tatou tu ma agaifanua, e aumai i le Atua. A tau lava la le Atua, ua atoa uma i ai na mea uma. O le Atua na faia le lalolagi ma le lagi ma Samoa, na Ia aumaia foi ma tatou tu ma tatou agaifanua, o lea la ua atoa ai i le faaupuga lea.

Ia ae talu ai o le mataupu leni e alu i o i le Komiti, ia o le a lava le mea e agai i ai le finagalo o le Komiti, ia o le mea lena e tatou te faia. Po o le toe tuu i ai e faaopoopo faalautele, ia e leai se mea o i ai. O lena lava o le mea e aupito sili ona taua, lea ua i le tino o le Faavae, ia ma ua faasao ai le mea na misi atoa ia i tatou uma.

Lau Afioga i le Fofoga Fetalai, o le taimi leni i le lalolagi, o vesiga uma ia e vevesi ai le lalolagi, e tala tala lava le gafa e tau i o i talitonuga, feeseeseaiga tau talitonuga a tapuaiga. O le mea la lena e taua tele ai le Teuteuga leni e pei ona tatou talanoaina ai i le tatou uluai Fono i a tatou fonotaga, na suia nei ina ua uma le Faiga Palota.

Lau Afioga i le Fofoga Fetalai, e le fou la i le Maota le Teuteuga leni. Ia manuia tele le tatou taeao.

FOFOGA FETALAI: Malo faafetai saunoa, ua manino ma malamalama le sini autu ma le faamoemoe o le Malo e tusa ai o leni Tulafono ma le Teuteuga o le Faavae.

Ia, o le avanoa leni tatou teí e saunoa ai sui usufono mamalu. Ia tulai mai le sui usufono mo Salega i Sasae.

Tofa OLO FITI AFOA VAAI: Lau Afioga i le Fofoga Fetalai, e puupuu lava se lagona vaivai o leni itumalo. O le lagolago a le itumalo lea i le suiga leni, e lagolago atoa, ae a faapasene e 90%.

E mafua lau Afioga i le Fofoga Fetalai, ona e le o manino lelei mai leí define lelei mai fuaiupu lea ua tuu i totonu, o le Atua le Alo ma le Agaga Paia. E leai sou tomali tele i mea faale-Tusi Paia, ae na o mafaufauga lea ua aumai e le Atua ia te au i le taimi leni ua ou tautala atu ai, leaga o lea ua faagagana ai au. E mafua, ona e eseese igoa o atua o isi Ekalesia. Ana faapea la e sau o le Atua, ia ma lona Alo o Iesu Keriso, alu atu, ia maoti lelei mai upu ia, leaga o isi Ekalesia, e tasi le Atua lea tatou te talitonu i ai, ae oo mai loa i o latou Alo, e eseese.

O le mea la lena, a faapea o le talitonuga o le tatou atunuu, o le Atua, o Iesu, o le Alo o Iesu, o lea ua liutino tagata i ai le Atua, faamaoti lelei mai i luga o le Tulafono, aua o Alo o isi Atua ia tai pei oí ua galo foi ia te au, o Buddah, o Allah, vaai i le tele o mau mea faapena?

Ia manatia foi o lea tatou te tilotilo i le mea o le Antichrist, lea e i ai le tulaga lea e tau fai atu. O le Antichrist, e oo mai nei o lana talaaga o le talaaga ia Iesu, ae sese le mea la e i totonu i le aumaiga e le Ekalesia, O le mea lena e tatau ona matua aloalo lelei i ai le tatou Malo i tulaga faapena. E manaia ae tuu i lalo le Atua o Iakopo, Isaako ma Aperaamo, manino, faamalalama lelei mai, sau ia Iesu Keriso le Alo o le Atua, manino.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

O le Agaga Paia lava ia, o le Agaga Paia lava latou, ae pei o nai vaega na lau Afioga i le Fofoga Fetalai e avatu ai se lagona vaivai ina ia faamanino atili mai i le definition i luma o le Tulafono ia Atua ma le Alo ma le Agaga Paia.

O le fesoasoani lea i le Palemia, aua e lelava tele foi ia i mea ia, ae o lea ua ou fesoasoani atu ia te ia.

Ma le agaga faaloalo, faafetai.

FOFOGA FETALAI: Malo i le saunoaga a le sui usufono. Ia tulai mai le sui usufono mo Faasaleleaga Nu 1 i le itu i Sisifo.

Afioga Hon GATOLOAIFAANA AMATAGA ALESANA GIDLOW (Faasaleleaga Nu. 1 i Sisifo): Faafetai tele i lau Afioga i le Fofoga Fetalai mo le avanoa mo Faasaleleaga Nu 1 i Sisifo. Ua ou tulai atu lau Afioga i le Fofoga Fetalai, e fia faaleo le agaga faafetai i le Afioga i le Palemia po o le Taitai foi o Samoa, aua o le Tulafono Tau Faaofi po o le suiga o le Faavae, faamaninoina foi o nisi o vaega o le Faavae e pei ona opea nei i le Maota, e le o se mea faigofie ona lotea lau Afioga i le Fofoga Fetalai. Aua o lagona i nei vaiata e tusa ai ma le va faafeagai o le tagata ma lona Atua, ua suavaia, po ua le toe manao foi le tagata e faailoa atu ona talitonuga, ona ua pei e mama, pei e mumusu i upuia, ma faitiaina i le tulaga o lo o i ai lo latou talitonuga i le Atua na faia ia. A o le tulai mai o le Tulafono Tau Faaofi lena, ua lagona ai i lou mafaufau, le toa o le taitaiga a Samoa o lo o tulai mai. O le taimi lena, ou te lagona, o tagata faapenei e tataua ona tulai mai lau Afioga, o tagata totoa, e aua nei mama i luma o le lalolagi e faaali atu le pule o lo o tatou i ai i le lalolagi lena lau Afioga i le Fofoga Fetalai.

Ua ou lagona, e le tau faamatalaina, le tele o taimi ua tatou pepese ai ma tatou faapea mai, faafetai i le alofa o le Atua, ua tafisea mala faalenatura sa fofou mai ia Samoa. Aisea? Aua faatoa tatou vivii lava lea ma pepese ina ua alu ese afa. A o le taimi a o tulai mai a o saogalemu ma filemu le tatou atunuu, ailoga e atoatoa le tatou talitonuga ma tatou tatalo e tuu atu i le Atua ina ia puipui ma leoleo ia Samoa, ma fai le faamuamua e tataua ona i ai. Ae peitai, o lea ua faatonu mai i i ma aumai i i le mea e tataua ona tatou faamuamua, o le Tolu Tasi Paia, The Holy Trinity. Ou te talitonu o i ina ua atoatoa ai le talitonuga faakerisiano, e leai ma se isi talitonuga i lena lalolagi latou te faia le Holy Trinity, le Tama, le Alo ma le Agaga Paia. Ae faavae foi i luga i le afio mai o Iesu Keriso, maluu faalavaau aua tatou.

Pau o lea lau Afioga i le Fofoga Fetalai, o lea ua tatou faamaninoina le tatou Faavae, o le Atua o le Tolu Tasi Paia tatou te tapuai ma tatou ifo, ma tatou faamuamua, faavae i ai Samoa. Ae peitai, avea ia lena avanoa lau Afioga i le Fofoga Fetalai e faaopoopo atu ai foi i le tatalo a le aufaitatalo a le Aufaigaluega a le Atua o lo o latou nonomanu mo le manuia o Samoa, tatalo foi mo tagatanuu o Samoa, ina ia liuliu o latou finagalo, faamuamua le Atua e taofia ai soligatulafono, e taofia ai le le toafilemu manatu eseese, o lo o mafai ai ona tulai mai anetikeriso ia o lo o tatou faalogo i ai.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

Ua le saogalemu ma le filemu ai Samoa. Ia tatou savavali i mea ua tatou talitonu ai, e leai se tasi e atoatoa, ae tatou te taumafai, aua o le tagata, na aumaia i le lalolagi i lona le atoatoa, ae mafai ona tatou atoatoa, pe a tatou mulimulitai e tusa ai ma le finagalo o le na faia i tatou.

Lau Afioga i le Fofoga Fetalai, o sina faaopoopo atu lea e avatu ai le lagolagosua, avatu ai le faafetai i le Palemia, e tusa ai ma le lototele ma le toa e tau atu i le lalolagi atoa, o Samoa, e faavae i le Holy Trintiy, le Tama, le Alo ma le Agaga Sa.

Ia manuia le tatou Fonotaga, manuia lau Afioga i le Fofoga Fetalai. Faafetai.

FOFOGA FETALAI: Faafetai. Malo saunoa i lau Afioga i le sui usufono mamalu, ma ua tulai mai le Afioga i le sui usufono mamalu mo Vaisigano Nu 1. Ia saunoa ia lau Afioga i le sui usufono.

Tofa LOPAOO NATANIELU MUA (Vaisigano Nu. 1): Faafetai i lau Afioga i le Fofoga Fetalai, faapea foi le Afioga i le Palemia ma le Sui Palemia ma le mamalu o le Kapeneta, Minisita Lagolago, ma sui usufono mamalu o lenei Maota.

E tulai atu foi e fai se manatu o lenei itumalo i le Teuteuga. O le matou lava manatu ia e le o lava le Teuteuga, aua e i ai le manatu a faapea tatou te serious i le mea lea, sui le freedom of religion i le christianity. Ae ui i lea, e i ai le manatu e faapea tatou te faia le Tulafono Tau Faaofi i le taimi lenei ae tatou te manatu luma. Ae mo lotu o lo o i ai i le taimi lenei, maybe e fai sina special provision foi lea e accept ai latou ona o lea ua iinei. Aua e le iloa pe mulimuli ane lau Afioga tatou te le iloa i ni tupulaga o i ai i luma, ae te i ua sau se lotu talako. Talu ai ona o le religion lea e i totonu o le tatou Faavae e mafai lava foi ona o mai fai iinei. Ae i ai le manatu o lenei itumalo, a tatou manumanu i le tatou faakerisiano, e le o lava le Teuteuga lea. E le o lava le Teuteuga na o le faaí .. O le label lea o Samoa o le atunuu kerisiano, ae sa i ai le manatu faapea e tataua ona tilotilo i le tulaga lea i le fuaiupu lea o le saolotoga o le tapuaiga, aua o i ina lea e mafai ai ona omai so o se lotu i totonu o le tatou atunuu. A manatu i tupulaga o lalovaoa ma tupulaga i le lumanai, ua tatou vaai i le vevesi o fetauaiga lea e i ai i totonu o le lalolagi. Ae paga lea, o isi o tagata mai isi lotu ia, mai le taimi lenei latou te mafai ona faatau fana, meatau ma mea faapena. A vaivai la le tatou puipuiga, ae i ai se manatu e alofa ai i se taimi o i luma i tupulaga o lo o lalovaoa ma tupulaga e le i fananau mai o le tatou atunuu, ae pei o le tatou tiute lena. E i ai foi le manatu e faigata ona o le tulaga i le tatou auai i le Faalapotopotoga o Malo Afaatasi, ae alofa mai le Atua e fesoasoani mai, aumai ni finagalo, aumai se manatu e mafai ai ona toa le tofa ma le faautautaga a Samoa, latou te faia ai e latou se faaiuga aua le lelei mo le taimi nei ma aso o i luma.

O le matou manatu lea ma le faaaloalo, faafetai i lau Afioga. Ia manuia le Fono.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

FOFOGA FETALAI: Malo faafetai. Tulai mai le sui usufono mo Anoamaa Sisifo.

Tofa Hon LAUOFO FONOTOE NUA FESILI PIERRE LAUOFO: E momoli atu le faafetai mo le avanoa, faafetai foi i le Afioga i le Palemia ma le Kapeneta i lenei foi Tulafono Tau Faaofi o le Teuteuga o le Faavae o le Malo. Ua aumai le folasaga, e ui lava o upu nei o lo o i totonu foi o upu tomua o le Faavae po o le Preamble, a o lea ua tuuina i lalo i le tino o le Faavae, le tino lea e mafai ona faamalosi po o le enforceable part of the Constitution. O lona uiga o se fuafuaga lelei. Ae ou te vaavaai atu i le Teuteuga e pei ona aumai, e foliga mai ia au e leai se malosiaga e taofia ai ni Ekalesia po o ni talitonuga po o ni tapuaiga e le o ni tapuaiga kerisiano ona faavae i totonu o le atunuu. Atonu e i ai tulaga e lavelave ai foi pe a faataoto se faaupuga maoti faapena i totonu o le Faavae ona e fua foi i isi fuaiupu o le Faavae i le tulaga foi lea o le Tulafono faailoga Ekalesia, pe faailoga tagata foi.

O isi vaega na ae taoto la tulaga na, a o le mea moni lava ia i lau vaai, atonu e le o le agaga foi lea o le Malo o le taofia o nisi Ekalesia fou. Ae foliga mai i le tulaga lea na aumai ai le Teuteuga, e pei o lau lena maitau ma lau vaai. Ae sao pe a faapea o se talitonuga faapena aua manatua foi lau Afioga i le Fofoga Fetalai, i lenei lava vaitau ua tatou i ai ua matua faigata lava ona taofia le ofi mai o ni talitonuga ese faapea pe a fua i tekonolosi ua i ai i nei ona po, fua i le internet, fua i le social media. E le tau faavaea la i Samoa nei ni Ekalesia po o ni talitonuga e le o ni talitonuga kerisiano. O lea ua aoaina foi alo ma fanau o le atunuu na ona omiomi lava o le computer. Aua o le tele o Ekalesia e oo lava i Ekalesia Kerisiano ma Ekalesia e le o ni Ekalesia po o ni talitonuga kerisiano, ua faaoga TV, o leitio, internet e faasalalau ai a latou talaiga i o latou foi talitonuga. E le mamao atu nei foi na ou vaavaai ai ma ou matamata i news a Ausetalia, e tasi lea faafitauli o la foi e faafeagai ma le Malo o Ausetalia, o le faaoga o le Faalapotopotoga po o vaega ia sa taua e le isi tootoo ua mavae atu, o le vaega faatupu faalavelave, e faaoga mea ia e sau ai a latou talaiga faapea. E faigata tele ona taofia e tatou ia mea. Ae faafetai o lea ua tuu i totonu o le vaega lea o le Faavae, e faamalosi ai le Faavae.

Na pau lena o le tulaga e pei ona ou talanoa atu ai. Ae afai o le agaga lea e pei ona ou tilotilo atu i le pepa o faamatalaga po o le Explanatory Memorandum, o lea e aumai foi lele faapea, o le faamoemoe ina ia faamaonia ai le dominance of Christianity in Samoa. E sao, manaia tele lea faamoemoe, e pau lava le mea e faamanatu, o le dominance of Christianity in Samoa e le dominance ona o ni upu e tusia i totonu o le Faavae pe tusia i totonu o se Tulafono. O le dominance i tagata ma o latou talitonuga i totonu i o latou loto ma o latou mafaufau, ia ma latou tapuaiga e talitonu ai i le Atua. O le ata lena o le Christianity i totonu o le atunuu. E pei o nai motugaafa ia a lenei usugafono, ia manuia tele le Fono lau Afioga.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

FOFOGA FETALAI: Malo. Ia tulai mai se isi sui usufono e fia saunoa. Tulai mai le sui usufono mo Alataua Sisifo.

Afioga ALIIMALEMANU ALOFA TUUAU: Lau Afioga i le Fofoga Fetalai, e tulai atu e fai se manatu i le Tulafono ma le Teuteuga. E talitonu lenei itumalo, e ui lava o lea matou te saofafai atu i i le Itu Agai, ae a i ai lava mataupu matagofie faapenei, e tatau lava ona lagolagoina ma fai i ai se manatu.

O le Tulafono e pei ona opea i Maota, e lagolagoina i le tulaga lea, ona o popolega i nei oo mai tu faaterorisi e pei ona i ai ma tatou matauina i Televisi le sauaina ma le matelaina o atunuu i fafo. Ma o i ina tatou te molimauina ai le alofa tunoa o le Atua ia Samoa.

Ae pei ona maua i nisi o saunoaga, e pei e leai se malosiaga tele o i ai. E sao e mafai ona tatou faapea, o tatou o le atunuu kerisiano e faavae i le Atua. Ae o la e i ai lava le avanoa e o mai ai pea i totonu tapuaiga, tapuaiga ia faaterorisi lea e i ai le popolega o lenei itumalo. E i ai le agaga pe mafai ona tuu i ai se faaupuga faapea, na o Ekalesia Kerisiano e faataga i Samoa. Ou te talitonu o le tiute lena o tatou o Taitai, ina ia vaavaai i itu e puipui ai tatou, ina ia aua nei oo mai sauaga nei tatou te vaavaai atu i ai i Televisi. Ona e ui lava e malolosi tamaoiga o na atunuu ae na o lo o ola ma pulea e se olaga popole, se olaga e le mautonu po o le a le taimi o le a oo mai ai puapuaga. O se lagona lena o lenei itumalo i le lagolagoina o le Tulafono ma le matou naunauga lava, ina ia tuu i ai se isi malosiaga e mafai ai ona faasa isi ekalesia e le o ni ekalesia kerisiano ona oo mai i totonu o Samoa.

Ma le faaaloalo lava faafetai mo le avanoa.

FOFOGA FETALAI: Malo faafetai. Se i tulai mai le sui usufono mo Nuu Tu Taulaga Sisifo.

Afioga FAUMUINA ASI PAULI WAYNE FONG (Nuu Tu Taulaga i Sisifo): Faafetai i lau Afioga mo le avanoa foi ua tuuina mai i lenei itula aua se manatu o lenei itumalo. Faafetai atu foi i le Malo ona o le tulaga i le Tulafono ua mafai ona tuu mai, e sui ai foi le Faavae aua foi le tapuaiga. Ae fia fai atu se manatu e uiga i le tulaga o le suiga o le Faavae lea ina ia tuu i totonu le kerisiano faavae i le Atua, Tama, Alo ma le Agaga Paia. Ae tatalo atu ina ia fai atu se fautuaga ina ia tuu la i ai ma ni aiaiga. A mafai ona i ai ni aiaiga e o faatasi la ma le Faavae i le Atua. Ou te fai atu au ia, ona e i ai isi ekalesia, e le faapea e lavea uma ai, aemaise faifeau o latou o lo o latou faia le matafaioi lea o le tatalo i le Atua ma tulaga faapea. E uma ona tatalo i le Atua ae ese lava amio e sau alu fai. O le mea e tatau ona alu ai ma aiaiga ina ia mafai ona iloa atu ai, o la e kerisiano ma Faavae i le Atua, le Atua le Tama, aua e i ai foi le tama o le lalolagi e le lelei foi. Ae fautua atu i le Komiti pe a ave, toe tilotilo i ai i nai aiaiga o lo oi .

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalaií .

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O lea ua maua tonu atu le sao. O lona uiga e tatau foi ona tuu ai i totonu o le Faavae, ma faatonuga i le amio e tatau ona amio ai le faifeau.

Afioga FAUMUINA ASI PAULI WAYNE FONG: Lau Afioga i le Palemia, e sao lelei. E tuu i ai ma ni nai faatonuga e taitaia ai le faiga o ekalesia ina ia mafai ona tapuai sao i le Atua. Aua o le taimi nei, ua tatou tapuai foi i mea faaletino lava ia, e le mafai, o lea ou te tau tomanatu, aua e i ai foi isi ekalesia mai fafo e tai pei la o le Mosalemi e aumai ai ma ona aiaiga. Ou te toe manatu ai lava o le tatalo mai a le Afioga i le Palemia, e le o lava ia le population o le Malo o Samoa ona o le tulaga e pei o le tamaoaiga lea. A e tilotilo la i le mosalemi, e i ai le aiaiga lena e o faatasi ina ia mafai ona tupu ma faatuputupulaia le tamaoaiga foi lena atunuu, atonu e le talafeagai ma tatou ona e laitiiti tatou. Ae taatia ese la aua le tuua i ai le aiaiga lena. Ae tatou alu pea i le aiaiga tatou tatalo i le Atua i Aso Sa ma aso uma, tatou amio faa-Atua i aso uma lava.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalaií

FOFOGA FETALAI: Tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E i ai le isi high official e sau mai Indonesia, e lotu ai la i le lotu lea e te saunoa mai ai. Ona ou fai atu lea i le official, how do you manage? E te honor ina ia tapuaiga a lau ekalesia? Ae fai mai le official, o aiaiga nei e i ai, a ou manao lava e faaatoa le lima o au ava ina ia faatoatele ai le faitauaofai. E lua ituaiga aiaiga e tatau ona fai, aiaiga muamua o le ma talanoa lelei ma lou toalua ia maua mai lona maliega tusitusia. Ma le maliega lona lua, o le talanoa i le peresetene ia maua mai foi lona maliega tusitusia. Ona ou toe fesili lea, ua e taumafai la e faatino maliega? Ae fai mai le tala a le Indonesia, o le mala papala lena o lea ma te faafeagai nei, e feoloolo atu, masalo a io le matou aiga, ae toafe io le peresetene. E faapena foi ia Tulafono a Papua New Guinea, e i ai foi a latou aiaiga faapena i le tulaga lea ua e aumaia. O lona uiga a omai la ni ekalesia faapena i inei, e le mafai foi la ona faatinoina i lalo o le tatou Faavae, e i ai foi a tatou Tulafono faapena.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

FOFOGA FETALAI: Saunoa mai le sui usufonoí .

Afioga FAUMUINA ASI PAULI WAYNE FONG: Faafetai i lau Afioga, e leai e leai se faafinauga aua ou te iloa e le taitai ona lava o tatou laueleele e fai ai lea tulaga. Ae ou te toe manatu i le tala o le matou faamasinoga, sa tala mai ai le gafa o le mea sa matou tutupu mai ai. E lima faletama, e ono faletama, leaga o lenei vaitaimi o le tele o le tatou fia mama, ua ala ai ona le mafaia ona tatou le faia. Ae o le vaitaimi sa tilotilo i ai, sa mafai lava ona fai e toeaiina i la aso. O lea la tatou te tilotilo i ai, toetiiti lava tatou aiga uma. Ae leaga o lea ua oo mai i lenei vaitaimi lau Afioga i le Fofoga Fetalai, o lea ua faale-Atua lo tatou mafutaga i nei aso. E leai, na ona avatu faapena, tuu i ai nai teuteuga laiti e aoga ai foi ina iaí a faapea o oe ua fai oe ma faifeau foi, ia e savali lava la i le auala lea ina ia mafai ai ona faavae pea la Samoa i le Atua ae tuu nisi manatu. Ae e le o faapea o faia uma e faifeau, e i ai lava isi faifeau e o atu i totonu toe ai lava e latou a latou mamoe ma toe o i tua. Ae o le taimi lenei o upu tuusao, ina ia tatau ona fai nai aiaiga laiti ina ia mafai ai ona puipui la le kerisiano lava lea aemaise lava le kerisiano lau Afioga i le Fofoga Fetalai o lea e faamalosi atu, ina ia maua ai foi se auala lelei aua foi le taitaiina o le faavae kerisiano o le Malo o Samoa. O se manatu lea, ae ia manuia lava lau Afioga i le Fofoga Fetalai.

FOFOGA FETALAI: Faafetai. Se i maea le saunoaga a le Afioga i le sui Fofoga Fetalai ona lafo atu lea i lau Afioga i le sui usufono mo Faleata.

Tofa NAFOITOA TALAIMANU KETI (Gagaemauga Nu. 3): Le Atua le Tama le Alo ma le Atua le Agaga Sa, talosia ai ia maua pea le toafimalie o le Fonotaga a le Palemene i lenei aso. Malo le fai o le faiva.

E faatalofa atu foi i lau Afioga i le Palemia, le Sui Palemia ma le Kapeneta ma lena Itu o le Maota e faapea foi sui usufono mamalu o le Palemene. E faatalofa i le tapuaiga a le atunuu i la outou faafogafoga mai, i le taua o lenei suiga o le Faavae, aemaise o si ou itumalo e afua ai ona ou tulai ma ou nofoia le Nofoa.

Lau Afioga i le Fofoga Fetalai, ua le nofonofa lava lenei itumalo ma lenei usugafono. E matau atu ma le totoa i le taua i lenei itumalo o lenei suiga. E le o toe po malae i augatama i le afuaaga na faa-Samoa ai le Tusi Paia ma iloa ai e le atunuu le uiga moni o le tala e lelei. O le ala lea o le taumafai atu o so matou tulai atu, o lo o taoto ai le maa faamanatu o lo o i ai lava upu nei na faa-Samoa ai le Tusi Paia, o le sulu i ou vae ma le malamalama i ou ala.

Lau Afioga i le Fofoga Fetalai, e momoli lau faamalo i le Palemia ma le afuaga o lenei faamoemoe. E i ai nai Teuteuga e pei ona saunoa i ai sui usufono mamalu o le Palemene. E i ai foi lo matou taofi e taoto ai faapena. A o le agaga o le matou usugafono ma lenei itumalo Gagaemauga Nu. 3, e na o le momoli atu o le faafetai ma le faamalo. O lea ua malama i ulugalua ua taoto i ona taotoga matagofie le suiga o le Faavae e ala i mea nei o tapuaiga.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

E le o toe po lava se lilo, e lafalafa a Tuna ma talatala gafa, o tapuaiga lava o lea e tulai ai le vevesi o le atunuu, aemaise foi o le lalolagi atoa. O le ala lea ua matou tulai atu ai ma le agaga faaaloalo, na ona momoli atu o le agaga faamalo i le paia o le Malo i le taulagalaga i mea lelei. Ma e pei foi ona i ai le mataupu i le taimi ua sola, o le vave ona tagofia o le vave ona oo i ai ma fai se fofo, o le nofo filemu lena o si o tatou atunuu.

O le ala lea o le matou tulai atu lau Afioga i le Palemia ma le Kapeneta. E faamalo atu le Gagaemauga Nu. 3, ona o le afioaga lenei o Avao o lea e taoto ai upu nei ua taua i le suiga lenei. Ua matou le nofonofo, tau lava ina matou momoli atu le faamalo ma le faafetai i le taotoga o lea o le a agai i ai lo tatou Malo Tutoatasi e Faavae i le Atua le Tama, le Atua le Alo ma le Atua le Agaga Sa. O lea e taoto le oo atu o lenei suiga i le Komiti ia po o le matou Komiti. Ou te manatu e momoli ai le faamalo ma le faafetai i finagalo faaalua, ua tupu ai foi le lagona. Ona pau lava lea o si vaega e fia oo i ai sa matou faamatalaga i le taotoga o le trinity o le Tolu Tasi Paia. E moni ai nisi o saunoaga, o le Atua le Tama ma Iesu Keriso lona Alo ma le Agaga Paia. E pei lava ona i ai le Pese e 9 a le Ekalesia Metotisi - Ia tatou viia le Atua le Tama, viia Iesu le Alo, viia le Agaga Paia.

E pei o nai suiga ia e toe faaopoopo i nai toe Teuteuga, a o le agaga o le faamoemoe o le suiga o le Faavae, e matua lagolagoina e le Gagaemauga Nu. 3. Faafetai tele i lau Afioga mo le matou avanoa. Manuia le Fono.

FOFOGA FETALAI: Ona o lea ua tapa le Afioga i le sui usufono mamalu mo Faleata Sisifo, a maea ona sosoo loa lea ma le sui usufono mo Gagaifomauga Nu 3. Saunoa lau Afioga i le sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai i lau Afioga i le Fofoga Fetalai mo le avanoa. So o se suiga lava o le Faavae, ou te talitonu e tataua ona maua le avanoa o le tele o sui usufono e faaali ai o latou finagalo ona e taua. E le soona suia le Faavae ma e le tupu soo. E ala foi ona sui, ona ua talitonu le Malo ma le Palemene o se mea e tataua ona fai. E faafetaia ai le Afioga i le Palemia ma i latou i lenei suiga. O le suiga, ina ua faalogoina le suiga o le a sau, e tele i latou sa faaali o latou manatu ma taofi. O le manatu lava lea sa faia soo e nisi, e pei o le a fofou le tatou Malo e taofi nisi o ituaiga Ekalesia nisi o talitonuga. A o lea la ua mautinoa i le aso ma tuuina mai le suiga o le Faavae, pau lava le mea lea ua faamanino mai e le suiga, o le faamautuina reaffirmation, ia reaffirming le talitonuga o tatou o Samoa o le atunuu kerisiano e ala lea i le toe tuuina i totonu o le tino o le Faavae. O le faailoga lea o le atunuu alualu i luma, progress.

Ina ua ou oo atu i Niu Sila i le taimi lea, sa matou talanoa ai foi ma nisi o le au failotu ma nisi o le au tusitala. O le latou popolega lea. O lau tali, o Samoa o le atunuu e alu i luma, e le o se atunuu e alu i luma toe alu i tua. E leai se agaga i lou talitonuga e faia ni tulaga faapea e faasasa lea faasasa lea. Na o le atunuu e agai i luma. Ia manatua foi le mamalu o le Palemene lenei, o tatou le isi atunuu o lea ua avea ma laumua e fai mai ai fono tetele a le lalolagi.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

E faaeteete tele tatou i le tatou faapea atu ua tatou faasaina lotu Mosalemi tatou faasaina lotu mai fea ma fea. E avea ma auala e tau atu ai o tatou o se atunuu, e le o se atunuu kerisiano. Aua o tu ma aga kerisiano e faapena. E le faapea tatou te pepese o tatou te kerisiano ae tatou te faaalua i tatou aga ma tatou mea e fai, o tatou o se atunuu e le kerisiano. A tusi foi la tatou Tulafono, o lea ua manino, a tusi Tulafono i totonu lava o Samoa, ia mautinoa e le feteenai ma tu ma aga faakerisiano, leaga o lea ua faamau o tatou o le atunuu kerisiano. A o mai foi la tagata e tafafao mai aua e tasi lea alagatupe tele a tatou, so o se tagata po o le a le talitonuga e i ai, a oo mai i Samoa ia ona silafia, o Samoa o le atunuu kerisiano. Ia faaaloalo i tu ma aga faa-Samoa i taimi e tapuai ai ma tulaga faapena. A tatou o atu foi tatou i atunuu Mosalemi, e i ai lava atunuu tatou te o atu o tapuni malaevaalele, ae se i tatalo tagata. E leai se tatou malosiaga e sui ai ia mea. Tatou te o atu foi tatou te faaaloalo o le atunuu o le atunuu Mosalemi tatou te faaaloalo i a latou tu ma a latou aga. O le agaga tonu lea i lou talitonuga ou te auai i le suiga o le Tulafono. Tatou te taua i le lalolagi ma le atunuu atoa, o Samoa o le atunuu kerisiano, pau lea. Ae i ai foi la mea ia e aumai e le UN ma faalapotopotoga a le lalolagi, e aumai a latou mandates ma a latou tulafono po o mea latou te mananao e fai, e feteenai ma a tatou tu ma aga faakerisiano. O la ua latou iloa e le faia e Samoa. E le mafai ona faia e tatou mea ia o faaipoipoga faatama ma tama, teine ma teine ma mea faapena. O lea ua tatou tuua i totonu i i, ma o tatou taua i le lalolagi e faasa sa ona tupu i Samoa, leaga o tatou o le atunuu kerisiano, e tatou te le taua i ai ae tatou te faamautinoa o tatou o le i

O lau faafetai lea ma lau faamalo i le faiga o suiga talafeagai o le tatou Faavae, ae ou te faaeteete tele i finagalo o nisi o sui usufono e faapea tatou te faasa lea faasa lea, e leai e le o tatou. Ma e talu ona ola mai le kerisiano ua fiu le lalolagi ua fia taua e taumafai e tape le kerisiano, e le pe, e le pe foi ia tatou, tatou te le faatonutonu foi le faiga o lotu ma tapuaiga ma faifeau ma mea faapena i lou talitonuga. E momoli atu ai le faafetai a lenei sui usufono ma le lagolago a lenei itumalo, faafetai.

FOFOGA FETALAI: Malo faafetai. Se i tulai mai le sui usufono mo Gagaifomauga Nu. 3.

Afioga FAAULUSAU ROSA DUFFY STOWERS (Gagaifomauga Nu.3): Faafetai lava i lau Afioga i le Fofoga Fetalai mo le avanoa. I le amataina o le tatou Fonotaga i lenei taeao, sa faapena foi ona momoli laau i Fogaa i le mafuta mai o le Atua i tualumaga o le tatou Fonotaga. Ma e talitonu le taofi, e so o se Fonotaga lava e faia Fonotaga e auai le Maota nei, e talitonu lava e amata i le tatalo ma toe faaiuina i le tatalo. Ma o tu ia ma aga ia a le tatou atunuu. E 99.9% se i vagana le isi vaega o le .001, e masalo o le vaega lea mai le itumalo o lou tuagane lea e i ou autafa. Ae o kerisiano, ma o i foi o lo o atagia mai ai i i le malosi o le faatuatuga kerisiano i totonu o le tatou atunuu.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

Ma o le Tulafono Tau Faaofi foi e pei ona opea i Maota, ua agai ai le tatou Faavae, ma e matua lagolagoina e le matou itumalo le tofaliuliu i le Palemia ma le Kapeneta ma i latou foi sa amataina mai le suiga po o le faaopoopoga i le Faavae o le vaega lea. Ma e talitonu foi le taofi, e pei ona afea foi i saunoaga a sui usufono mamalu, e tele foi ni aiaiga e ono aafia ai le tulaga lea i le va i fafo. Ae ou te lagona lava ma ou talitonu e fai lava e le Atua le mea e tatau ona aumai i Taitai o le tatou Malo ma le Maota nei, e mafai ai ona toe faalauteleina le malosiaga o le vaega lea o le Tulafono Tau Faaofi ua tuu mai nei, po ua opea i le Maota. E pei ona saunoa le sui usufono mamalu lea na uma atu nei, o Samoa laalaa lea ua tatou i ai. Ma o le amataga foi lea o le vaega lea o le tuuina i totonu o le Constitution le vaega lea o le Christianity, o lo o i ai lava le taimi i luma e faapena ona aumai e le Alii, le taimi talafeagai e faalauteleina ma faamalosia ai le vaega lea.

O se motugaafa lena a le matou itumalo, e lagolagoina ai ma le malosi lenei Tulafono Tau Faaofi. Ma le faaloalo, faafetai.

FOFOGA FETALAI: Malo. Ia se i tu mai le sui usufono, leaga o lea ua ave le faamuamua i i, ae se i maea le sui usufono mo Palauli le Falefa ona tuu atu loa lea i le sui usufono mo Falelatai ma Samatau.

Afioga Hon FAUMUINA TIATIA FAAOLATANE LIUGA (Palauli le Falefa): Faafetai i lau Afioga i le Fofoga Fetalai mo le avanoa.

Faafetai foi i le Palemia mo le teuteuina o le Tulafono. E lagolagoina malosi e lou nei sui usufono ma lou itumalo lenei teuteuga. Ou te manatua ai lava le tala a le isi faifeau e masani ona fai, ðUa lotu Satani.ö O lea foi ua i le Palemene Satani. O lea e i ai Satani ia tatou te mafuta i i ou te le iloa po o totonu i i po o tua i o. E ala ona ouí .. O lea foi sa talanoa le sui usufono mo Salega Sasae i le tulaga lea o le anetikeriso. O le anetikeriso o le tagata na te le i taliaina le faaolataga. E so o se tagata lava e le talitonu i le faaolataga, o le anetikeriso, o lona uiga e tetee i le faaolataga na saunia e le tatou Matai. O talitonuga ia e i le lalolagi, e ova ma le 90% o talitonuga ia, sa ou talanoa i ai. E ala ona ou talanoa i ai, ina ia ou molimau, e na o le tasi lava le Atua, lea e tapuai i ai le aukerisiano, o le Atua o la e soifua. O le Atua o isi talitonuga ua pala ivi. O la e talitonu i leí . Na ou avea foi le Tusi Paia i le tagata Komunisi, o le tagata o le matuaií e fiu e talai mai ae ou talai atu foi au i ai, ave loa i ai le Tusi Paia e faitau ai. E lua vaiaso na faitau ai le Feagaiga Tuai, ae sau le tamaloa Vietnam lea fai mai, tusa o le Atua lea e te tapuai i ai o le Vietnamese. Ou fai atu, o le a le mea e te iloa ai o le Vietnamese? Ae fai mai, sole, so o se mea e i ai le Atua lea e te tapuai i ai, e malo. E fa super-power na tau ma Vietnam e malo. Ona ou fai atu lea, o le mea lena o lea ou te fai atu ai i le Atua lea. A e toe faitau la i le Feagaiga Fou, ona e iloa ai lea, ua faatoilalo e le Atua lea ou te talitonu ai, le mea lena e te fefe i ai, fefe i ai le lalolagi, o le oti. E leaga o le Atua lea ou te tapuai i ai, o le Atua na toe tu.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

O le mea lena o lea e fai mai ai le Aposetolo o Paulo, òE te talitonu i lou loto, tautino i lou gutu e te ola ai, talitonu i lou loto e te maua ai le amiotonu, ò aua o lau molimau lea e pei ona molimau le tele o sui usufono. E faaolaina ai oe. O le talitonu o lou loto, e oo atu ai ia te oe le amiotonu a le Atua. Fai mai Paulo i lanaí Faitau i le 2 Korinitoí .

Tofa Olo Fiti Afoa Vaai: Lau Afioga i le Fofoga Fetalai o le mea e fia faasao ma fia faamalalalama i le saunoaga a le sui usufono.

FOFOGA FETALAI: Leaga o lea ua afio i lalo le Afioga i le sui usufono mamalu ae sa ou manatu ou te le faatagaina lau faauilavea. Ae ui i lea, ia se i fai maia.

Tofa Olo Fiti Afoa Vaai: O lea ua talanoa le sui usufono ia Paulo ae masalo ua galo i le sui usufono mamalu, le talaiga a Setefano i Tamaseko na tagatavaleina e Paulo lea e taua e le sui usufono. Na tagatavaleina e Paulo lea e te talanoa mai ai.

FOFOGA FETALAI: E faamalulu atu i le sui usufono, o lena e tusi lou lima ia Ili Setefano. Se i toe tulai mai le sui sufono.

Afioga Hon FAUMUINA TIATIA FAAOLATANE LIUGA: O le mea la lea e leaga ai le sui usufono e le lotu. E le o Tamaseko na fasiotia ai Setefano, o Setefano o le tiakono. Na pau lava lea o le tiakono na matuai faia le galuega faafaifeau. O lana molimau, o lana lauga ina ia faaolaina tagata Iutaia.

Lau Afioga i le Fofoga Fetalai, o lea e fai mai Paulo, 2 Korinito o lona 3. Fai mai o outou o tusi faitau a Keriso. So o se tagata kerisiano lava, e le o le alu i le lotu le mea taua, ae pe faapefea ona e soifua. E tau mai lava e le Tusi Paia o le laau. O le mea lena o lea e fai mai ai, o lea foi e aumai e le Tusi Paia le faataitaiga, tuu pea le saito ma le titania e ola faatasi. Ou te lagolagoina le Teuteuga ae le lava. E pau lea mea lea ou te popole ai, ne i te i ua avea Samoa o le atunuu foi lea o Sotoma ma Komoro lea na taua e le isi sui usufono, na ona fai lava o le faa-Sotoma kafi ese ma le lalolagi. O le a le mea la e ua tupu? O la e ua i ai le sami mate, le sami oona, ua leai se mea, ua aveese. O le mea lena ou te fefe ai. Ae i le tulaga lea e i ai, e faaseesealuga le Teuteuga i luga o le tulaga, na o se vaega, ae tatau ona teuteu atili. Tuu pea le aia, le faitalia a le tagata ae teuteu atili leaga o lea e le o lelei. O le mea foi lea e faapea o le faasinoinolima i faafeagaiga, tatou te le ola faamasino. O aoaoga a le Tusi Paia, aua e te faamasino atu ina ne i faamasinoina oe. O le kerisiano matua atoatoa, e atoatoa ona ua i ai le Agaga Paia o le Atua.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

FOFOGA FETALAI: Ou te faamalulu atu, o le a faamaea le tatou aooga faale-Tusi Paia pe a maea mai le tatou malologa, ae ua malie le faafofoga i le paia o le Palemene, atonu e faapena foi le faafofoga mai a Ofisa Sili o Pulega o Matagaluega ma Faalapotopotoga, e pei o lae mau isi e fiafia i le saunoaga a le sui usufono ae mau foi isi e le o fiafia mai i ta vaai atu i ai. E ui i lea, ona ua oo mai le taimi o le malologa, o le a faataatiaese Galuega a le Fono Aoao mo lana malologa masani. Faafetai.

Na faataatiaese Taulumaga a le Fono Aoao i le itula e 10:42 i le taeao mo lana malologa masani ma toe faaauau i le itula e 11:47 i le taeao.

Na toe faaauau felafolafoaiga a le Fono Aoao i le faitauga faalua o le Tulafono Tau Faaofi o Teuteuga o le Faavae (Nu.2) 2016.

FOFOGA FETALAI: Ou te faasilasila atu ua amatalia Galuega ma Taulumaga a le Fono Aoao Faitulafono. Ua ou manatu foi ua maua le faasiliga malosi e le paia o sui usufono mamalu e faaauau ai le tatou galuega mo le aso.

E faia le malologa ua faapena ona faaiiu mai le pepa po o le saunoaga foi a le Afioga i le sui usufono mo Palauli le Falefa e tusa ai o le tatou mataupu silisili i lenei taeao. O le mea lea ou te tapa ma le faaloalo lau Afioga i le sui usufono mamalu.

Afioga Hon FAUMUINA TIATIA FAAOLATANE LIUGA: Faafetai lava i lau Afioga i le Fofoga Fetalai, faafetai foi ua sao i alo se taumafataga a le Afioga i le Palemia ma le Kapeneta aemaise foi le mamalu o lenei Palemene. Lau Afioga i le Fofoga Fetalai, o lea faatoa oo i le afa lau folasaga, a o le mataupu lea tatou te talanoa i ai, o le ola e faavavau. O lenei olaga tatou te soifua ma tatou ola ai, e mavae, o le lalolagi e mou atu, ae faafetai i le Malo ua ia aumai le ki, leaga o le ki lea e tatala ai avanoa mo tatou, na ona tau lava o le suafa o Iesu Keriso, Iesu Keriso, o Lou suafa e manumalo ai matou, matou manumalo ai, manumalo ai lau Afioga manumalo le la Vaega, ma le matou Vaega Faaupufai.

Lau Afioga i le Fofoga Fetalai, o le isi mataupu lea sa taua o le Tolutasi Paia, o le taua ia o le teuteuga lea i lona tulaga lea. A matou talanoa ma le vaega lea o Mosalemi ma matou faasoa i le mamalu o le Atua, o le latou tala, e ala ona le fiafia ia tatou le au kerisiano, ona ua tatou nonofo ma vaetolu le Atua. Ona ou fai atu lea, matou te le o vaetoluina le Atua, o le Atua e toatasi, o le Tama liutino tagata, o le Atua o le Agaga.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

Na liutino tagata le Atua ona o le alofa ia te oe ma au. Aua ana le liutino tagata le Atua, e le mafai ona e vaai i ai ma ou vaai i ai. Leaga o le mea lena na fai mai ai le Atua ia Mose, e le mafai ona e vaai mai ia te au ma e ola pea ae alu e faavava i se vaipapa ou te maalo atu ai ona e vaai mai lea i lou tua. O le malosi lena o le Atua lau Afioga, e le mafai le mafai e mata o le tagata ona vaai i le Atua le Tama. Lea na alofa ai, na sau lava alu i le falepovi e nofo ai, ona o lona alofa ia Samoa, alofa i faipule o lenei Palemene. Talosia ua outou talia le faaolataga. O lau tatalo lea, tou te le ola faamasino.

Lau Afioga i le Fofoga Fetalai, faafetai ua talia e lau Afioga le faaolataga, e patipati ou aao ma e vivii, o foliga ia o le tagata ua ola i le soifuaga loto mauualalo. Fai mai le aualii ia, o le mata i le mata, o le nifo i le nifo, o le mea lea o lea e fetauai ai nei le fanau a Isamaeli ma le fanau a Iakopo.

FOFOGA FETALAI: Tulai mai le sui usufono mo Aiga i le Tai pe ua i ai se mea...

Susuga Mulipola Leiataua Laki (Aiga i le Tai): Ou te tulai atu lau Afioga i le Fofoga Fetalai ma le faaaloalo e talosagaina le tootoo o lea ua maea le tatou sauniga i le taeao ae agai sao i le tatou mataupu.

Ma le faaaloalo lava.

FOFOGA FETALAI: Ia, ua faatuina mai le lafo toe lua ou minute le sui usufono o lo o saunoa.

Afioga Hon FAUMUINA TIATIA FAAOLATANE LIUGA: O le uso le la, sa ou lagolago i ai, o au palota uma lava la e i tai i Manono e le toe o atu ia te oe, sue sau galuega i le... o lea e le o le lotu le mea lea e fai, o le Tulafono Tau Faaofi.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ou te faafesili atu ona e le iloa po o le alii lea e talanoa i ai le sui usufono o le alii foi lena na sau ia te au. A o le alii lea na sau ia te au, o le Isaraelu. Ua ou le iloa po o le Isaraelu po o se Arapi lea na sau ia te au. A o le Isaraelu lea na sau, na oo le ma talanoaga ae fai mai le tala a le Isaraelu, o le mea lea ou te fiafia ai e sau i Samoa leaga o lea tou te tapuai i le matou tama. Ae sau le Arapi, ia manatu foi le Arapi ma le Isaraelu fai mai le tala a le Arapi, o lena e ese mea na e i tou tusi, ua outou nonofo fua ma faaliliu, o Isamaeli lea na ave e le toaina e osi ai le taulaga, e le o Isaako. O au la na ou faapea ou te alu i Isaraelu, se i ou alu e fai lau fesili. Na ou fai i le latou Amepasa, faamolemole lava po o lea le fesili, ou fai atu, o au lea e pasa, e oo mai lava o lea e pasa, o lea e aumai soo lava e sau foi e talanoa mai, o le fanua e tafe ai le suasusu ma le meli.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

A o le taimi la lenei, na o le pau lava le suasusu la e tafe, na o le suauu, ae leai lava ma se mea o la e tafe uma lava i i i i le itu a Isaako. O le mea la lena sa ou fesili atu ai po o ai lena sa oulua talanoa po o le Isaraelu po o le Arapi ae pue mai se i tatou feiloai i se taimi.

FOFOGA FETALAI: Ia tulai mai le sui usufono e faaiu mai le saunoaga, toe lua ou minute.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Palemia, e lava le taimi sa ou i ai i sasae tutotonu, sa ou talanoa i tagata Arapi, aemaise lava o suli o le tama lea o Isamaeli. E sao lelei lava le saunoaga a le Afioga i le Palemia. Sa ou talanoa foi i suli o Esau lea sa faamanuia i ai Isaako, sa ou talanoa foi i suli o Iakopo. E sao la le Afioga i le Palemia, e pei la o le lagolagoina o le Tulafono Tau Faaofi le mea taua, aua o Samoa o le atunuu kerisiano. E le gata la ia i ai i totonu i i, a ia ola ai. E le taua lou faitau i le Tusi Paia ae ia e ola ai. E le aoga le tauloto ae ia e ola ai.

Lau Afioga i le Fofoga Fetalai, ia ona uma atu i lea. O lea lava e fai mai le vaega lea pe mafai ona fai se valaau, po o ai tagata e latou te taliaina... Ae leai, ia faamanuia le Atua i lau Afioga i le Palemia...

Afioga Faumuina Asi Pauli Wayne Fong: Lau Afioga i le Fofoga Fetalai....

FOFOGA FETALAI: Masalo o le a sau se taimi ona faapena lea ona fai se tatou avanoa i mataupu silisili ona maua ai lea o avanoa lelei e sui usufono mamalu, ua maitau atu e ese le manaia, e logo i tino matagi lelei i le saunoaga a le sui usufono mo Palauli le Falefa.

Ae talu ai e maitau atu o lea ua maea le saunoaga a le sui usufono....

Afioga Faumuina Asi Pauli Wayne Fong: O le mea fia faamalamalama lau Afioga, o lea sa ou lauga i faifeau e folafola, o i tonu lava lea e aoga i ai le fautuaga lea na avatu, e folafola ma savali ai, aua e ese lou folafola ae ese au mea e fai. O lea la e tatalo atu ai i lau Afioga, a savali ai le susuga i le faifeau, ua matua manaia lava lau Afioga i le Fofoga Fetalai, faafetai.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai, e le o aoaoga na faakerisiano lea e sau i le Tusi Paia, o le ola faamagalalo. *‘Amuia i latou e faatupuina le filemu, aua e taua i latou o atalii ma afafine o le Atua.’*

Afioga Faumuina Asi Pauli Wayne Fong: Lau Afioga i le Fofoga Fetalai, o lea lava sa saunoa le tama o le atunuu, e le faia ni faamagaloga iinei na o mea moni lava lau Afioga.

Ma le faaaloalo lava lau Afioga, faafetai.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

FOFOGA FETALAI: Ia ona o le suafa Faumuina e ese lava le malamalama lelei i le Tusi Paia ma le mataupu silisili, e taufai sao uma oulua.

O le mea lea, ou te tapa ma le faaaloalo le sui usufono mo Falelatai ma Samatau, ia... O le a le mea e lulu soo ai lou ao pe a saunoa Faumui ae se i aumaia sou finagalo.

Afioga TAEFU LEMI (Falelatai ma Samatau): I le suafa mamalu o le Atua le Tama, le Alo ma le Agaga Paia.

Lau Afioga i le Fofoga Fetalai, e momoli atu le faafetai tele i lenei vaega o le taeao aemaise o le mataupu taua e pei ona folasia i luma o lenei Maota. Ou te faatalofa atu i sui usufono mamalu o sui usufono filifilia o Samoa aemaise foi o lenei tausaga fou ua tatou aulia. E faafeiloai atu isi ou itumalo o Falelatai ma Samatau ma la outou tapuaiga, o se tasi o itumalo na uluai to i ai le alafale o le Talalelei i Samoa i Matamatanononofo, sa i ai le fale lomitusi a le Ekalesia i lona amataga. Ae momoli le faafetai e tusa ai ma le Teuteuga o le Faavae e pei ona i ai.

O le silia ma le 4,000 tausaga talu ai na faatoa fofoa ai le ono fanau mai o le Ekalesia Kerisiano i Samoa ma le lalolagi atoa, silia ma le 4,000 tausaga talu ai. O le soifuaga lenei tatou te ola ai ma le paneta lenei tatou te i ai nei, earth, ua silia ma le fia sefulu miliona tausaga. A tatou talanoa i tapuaiga, e mafai ona tatou faapea o le mea ananafi, e le o se mea na amata mai ai i le fia miliona o tausaga, o talitonuga la e ua ou talitonu lava au i ai. Ma e alu atu ai i ina sau ia fatufatuga aua le faamoemoe lea.

FOFOGA FETALAI: Malie le sui usufono o lo o tulai mai le faauilavea a le sui usufono mo Faleata Sisifo, tulai mai e faapuupuu mai le saunoaga.

Tofa Lealailepule Rimoni Aiafi: E fia fesoasoani atu i le Afioga i le sui usufono mamalu, o le tausaga lea tatou te Fono ai nei, o le 2017. Ia o le mea lena o lea e fia fesoasoani atu ai i le sui usufono, o le 4,000 lea e saunoa i ai, ua mamao tele i tua, e le iloa po o fea le mea e aumai ai.

Ma le faaaloalo lava.

FOFOGA FETALAI: Ia e aoga foi le faauilavea, malie le sui usufono mamalu e tuutuu mai i luma le saunoaga ua mamao tele le saunoaga.

Afioga TAEFU LEMI: Lau Afioga i le Fofoga Fetalai, o le 2017 lenei o tausaga talu ona fanau mai le kerisiano, Ekalesia Kerisiano i le lalolagi. A o le isi 2000+ i talaatu, o tausaga na sa fofoa mai ai Aperaamo ma le isi vaega. O le Ekalesia la lena o lea tatou te talitonu i ai ma agai i ai le Teuteuga lea tatou te taumafai nei e teuteu. O le faaiuga o le seneturi lona ono ma le amataga o le seneturi lona fitu, na faatoa tulai mai ai le ekalesia Mosalemi. E tulai mai la tama ia, e tau faavae i luga o le ea, ia ona o loa lea faavae mai Aperaamo ma a tatou tama ia sa amata maia si a tatou mea ma fafau ai i luga le latou talitonuga, o le talitonuga faakerisiano lea tatou te i ai.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

Ua i ai foi la ma isi talitonuga e talitonu i ai tatou. O le talaiga o mea nei faale tapuaiga, o talaiga, o i latou lava la e malosi le talaiga, e mafuli lava i ai le toatele o le au tapuai ma le ola o le galuega.

Ae i ai le talitonuga lau Afioga i le Fofoga Fetalai, e i ai lava si vala lea e tau faanenefu, aua e talalotu le talitonuga lea e tulai mai, so o se mea e filogia ai, e i ai uma talitonuga nei, e le o i ai se nofo filemu. E i ai le talitonuga i faamaumauga, ua tele atu tagata ua maliliu i le lalolagi e afua mai i talitonuga faalelotu nai lo tagata ua maliliu i taua.

Lau Afioga i le Fofoga Fetalai, o i ina lea e tau aloalo atu ai lota sa, aua e alu aso ae sau aso. Ou te faafetai lava i le Malo e uiga i le teuteuga lea, manaia, se i tau faamanino lava po o fea tonu le Atua lea tatou te agai i ai. Paga lea ua 54 tausaga ua tuai ai ona aumai. O le manaia ia o le ala na faataoto e tuua ua mavae pe ana taoto ai lava ma le vala lea, tatou te talitonu i le Atua Tasi Tolu Paia, le Tama le Alo ma le Agaga Paia. Aua e talalotu isi tagata, fai mai le talitonuga ona faapena lea ona faigata lo tatou soifua ma so matou ola, tatou te le fia ola ma le fia ola ma soifua Samoa i le soifuaga la e i ai la atunuu.

Tau ina ou faatupu manatu lau Afioga i le Fofoga Fetalai, ae manaia pe ana tasi se tapuaiga e agai i ai Samoa, pe kerisiano pe Mosalemi ou te le... ae ia tasi, ina ia aua ai nei lagaia ni faafitauli i le 50 agai i le 100 tausaga o lumanai e mafua mai i le eseseega o talitonuga. Ae ua ou talitonu au, o le amatamea lea ua fai nei i le aso. Ou te lagolago ai i le Teuteuga o le Faavae, ina ia faamanino ma tuu i totonu o le autu o le Faavae le Atua lea tatou te tapuai ai. Ia manuia tele le Fono.

Afioga FUIMAONO TEO SAMUELU TEO (Falealili Sasae): Lau Afioga i le Fofoga Fetalai....

FOFOGA FETALAI: Malo. Ia ma ua tagatasi le saunoaga a sui usufono. E i ai le manatu e le se teuteuga tele le Teuteuga o le tatou Faavae ae anoa, ma o le taula lea o le soifuaga o le Samoa ma le talitonuga na faavae ai e matua si o tatou atunuu e Faavae i le Atua Samoa. E i ai le manatu malilie sui usufono e faapuupuu mai a outou saunoaga ina ia faapena ona vave taunuu la tatou galuega i se mutaaga o tatou galuega i lenei aso i lona siui. Ia tulai mai le sui usufono mo Falealili Sasae.

Afioga FUIMAONO TEO SAMUELU TEO: Faafetai i le taitaiga a le Atua ua maua lou soifua laulelei i lenei taeao, lau Afioga i le Fofoga Fetalai aemaise foi le Palemia ma le mamalu o le Fonousu a Samoa. E le mafai ona nofonofo sui usufono o Falealili e le faia se manatu, ae sa ususi lava faavaasavili le faalogologo ma le maitau i agiga a le matagi i finagalo ma manatu ua faaalua. O le mea e aupito sili ona ou faafetai ai, faafetai o lea e maua o lo o i ai le agaga tapuai i sui usufono o le Palemene a Samoa o lo o i ai le talitonuga i le Atua.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

Ae i ai lava upu a le atunuu, o le tuigau ma le taputoa o alii pe a pale i tiaseu, e le maeu le silatoa a tautai aua o maga seuvale ia o faatamasoaliiga. O le Tulafono Tau Faaofi Toe Teuteu lenei, e ese lava lona maaleale. E moni tatou te faatalasua ma tatou talie, ae o se mataupu e mamafa ia i latou o lo o laugaina le salamo, i fatafaitaulaga e fia.

E i ai lou lagona ou te matua lagolagoina le Teuteuga o lo o i ai nei, i lona tulaga atoatoa o lo o i ai. Ou te le auai i se Teuteuga e i ai ni ona tapulaa, ona o nei le itu, afai o la e i ai ni tapulaa po o ni itu e faasasa ai Ekalesia, o lona uiga, ua limiti le aiatatau a le tagata soifua, lea foi e i totonu o le Faavae o le atunuu, e saoloto le tagata e tapuai po o le a lava lona talitonuga. Ae i ai lou lagona, e pei lava ona tusi i le faavaa o le Faavae o Samoa, Faavae i le Atua Samoa, lea la ua toe faamatamata tetele i totonu le aano o le Faavae, po o le tino o le Faavae, e tau atu i le lalolagi o Samoa o le atunuu ua uma ona tofi, ae Faavae i le Atua. O le Atua le Tama, o le Atua le Alo, ma le Atua le Agaga Paia.

Na saua i lau faalogo nei nisi foi o lagona, ona i ai lea o le manumanuga, aua e le tutusa talitonuga e agai i le Trinity po o le Tolu Tasi Paia. E i ai le Ekalesia latou te talitonu e na o Iesu Keriso lava, ae o lea e i ai i totonu o le Faavae lea o le Atua, o lona Alo. E i ai foi le Ekalesia e le talitonu i le Tolu Tasi Paia po o le Atua le Tama le Atua le Alo ma le Atua le Agaga Paia, ae latou te talitonu i le mamalu o le Atua, o Iesu Keriso lava lena. Aua e pei ona outou silafia o le lotu Molimau a Ieova e talitonu na o Iesu lava. O le Bahai, o le faauigaina o le Bahai, po o le Bahaula e talitonu i ai, *itø the glory of God*, o lona uiga o le mamalu o le Atua. A tuu mai la i lalo o le tatou Faavae ae a tatou faasasaina pe fai ni nai vaega teuteu, o lona uiga ua aafia o tatou talitonuga ae o lea lava e talitonu i le mea e tasi. E moni lava e felefele lagona ma manatu ma talitonuga, ae auga lava i le mea e tasi. Ae o le mea e aupito sili ona faafetai ai, o lea lava e mau le toovae o le Palemene, e leai lava se isi i lau maitau, e le o agai lava i le tapuaiga.

O le Faavae lena ma o le auga tonu lena o le Tulafono Tau Faaofi, e ala ona faia, ina ia puipuia ma maua le saogalemu o tagatanuu, maua le toafimalie. E le o vevesi Samoa i tapuaiga, e le o i ai ni taua o sii ni tapuaiga i Samoa, ae o lea ua fai le tatou Faavae, e ono toe teuteu ai ma faamautu le Faavae o Samoa, e talitonu lava i le Atua. Ona i ai lea o lou lagona, faafetai, faafetai foi mo finagalo faaalua, o lea e matau, e tele lava aoaoga e pei ona tolaulauina e nisi foi o sui usufono po o nisi foi o mautofiga i Ekalesia, o le aoaoga lea a Setefano, o le aoaoga a Paulo. Ae tasi lava le aoaoga a Paulo ou te fia faamamafa ae le i faaiuina lau faamatalaga, fai mai le aoaoga a Paulo, *'Afai ou te tautala i gagana a tagata atoa ma agelu ae leai sou alofa, e pei a au o le apamemea taalili po o le sumepalo tagitagi'*. Ae o le taua, lea na faia e le Alii Faaola le togiola mo oe ma au. O le alofa, a i ai le alofa i le Palemene o lena. O le alofa lena lea ua teuteu ai le Tulafono Tau Faaofi.

Ia manuia le tatou Fono.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

FOFOGA FETALAI: Malo faafetai. E maitau atu le sui usufono mo Safata i Sisifo, ia masalo toe pau lea o le sui usufono, sosoo ai ma le sui usufono mo Aleipata Itupa i Lalo, ia ona lafo atu lea i le Malo. Ia e faapea foi se tasi o sui usufono o le itu lea.

Afioga LEAANA RONNIE POSINI (Safata i Sisifo): Lau Afioga i le Fofoga Fetalai, ou te tulai atu foi e faaali se manatu o lenei itumalo.

E momoli le agaga faafetai tele i le Afioga i le Taitai o le Malo i le Teuteuga o le Faavae. E moni lava e matua lagolagoina e lenei itumalo le Teuteuga o le Faavae. Pau lava lea i lau Afioga, o lea sa saunoa le Palemia, pe mafai ona toe faatalatalanoa ae tuu i ai a tatou tu ma aganuu, aua e talitonu lava o le toamalie o le tatou atunuu, o a tatou tu ma aganuu. E oo lava i totonu o lenei Palemene, e mamalu le tatou Palemene nei ma toamalie ma filemu, o le tatou tu ma aganuu.

FOFOGA FETALAI: Ua ou faamanatu atu i le sui usufono mamalu, atonu o lo o manino i le sui usufono le folasaga a le Afioga i le Palemia, o lenei Teuteuga o le Faavae e toe tuuina atu i le Komiti, ia ona toe maua foi lea o isi avanoa o sui usufono mamalu, ia aemaise foi o le atunuu ma le Aufaigaluega Paia a le Atua o lo o faapena ona avanoa so o se tasi, e faaalua o latou finagalo i le Komiti lenei, pe a maea le tualumaga o felafolafoaiga a le Fono Aoa, ona toe tuu atu foi lea i le Komiti. O le manatu lava o le Malo ia lava avanoa. E pei o le toe tali atu lea ma le tau faamalamalamaga i le saunoaga matagofie a le sui usufono.

Tulai mai le sui usufono e faapuupuu mai lou finagalo.

Afioga LEAANA RONNIE POSINI: Faafetai tele i lau Afioga o lea ua maua mai e lau Afioga, e pei o le mea lea lea na taua foi e ono faapoopo i ai le tatou tu ma aganuu i totonu o le tatou Teuteuga lea o le Faavae. E pei ona taua foi i le tatou va ma le Faamasinoga i le tatou Komisi Suesue, o le tatou va nonofo lea na fai ai, o le va nonofo o le tatou aganuu e maua ai le toamalie. Ia o se toe faapoopo atu lea ma le agaga faaaloalo i lau Afioga i le Fofoga Fetalai. Manuia le Fono.

FOFOGA FETALAI: Malo faafetai. Ia se i faamaea mai pea la le tou tulimanu. Tulai mai le sui usufono mo Falealili Sisifo.

Tofa AUMUA ISAIA LAMEKO (Falealili Sisifo): Lau Afioga i le Fofoga Fetalai, faafetai i lenei taeao. E talitonu le manatu o lea ua faataatia e le Palemia le Teuteuga o le tatou Faavae. E talitonu foi lenei itumalo o Falealili Sisifo, e faamauina le lagolagoina o le Teuteuga.

E momoli atu foi le faamalo ma le faafetai i le Palemia mo le aumaiga o lenei Teuteuga. Ae na o sina matou fautuaga, pe mafai ona faalautele le faauigaina, o le upu kerisiano i totonu o le tatou Teuteuga.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

E le gata foi i lea, o lo o i ai ma le freedom of religion. E tatau foi la ona i ai se Teuteuga o le vaega lea ia saoloto ai tagata e filifili po o le a le Ekalesia Kerisiano e fia auai ai.

Ia o se matou manatu lea e momoli atu ai le agaga faafetai i le Malo e tusa ai ma lenei Tulafono Tau Faaofi Toe Teuteu, faafetai.

FOFOGA FETALAI: Faafetai i le finagalo e pei ona lagolagoina le fautuaga a le Nofoa ina ia faapupuu mai saunoaga a sui usufono mamalu.

Ia se i tulai mai le sui usufono mo Anoamaa Sasae.

Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa Sasae): Malo faafetai i lau Afioga i le Fofoga Fetalai, malo foi le faatoatoa i lenei vaega o le aso, faapea foi le paia o le Fonousu a Samoa. E tulai atu ma le agaga faaaloalo e fia fai foi sina sao puupuu aua le tatou Tulafono Tau Faaofi, aemaise lava o le suiga o le Faavae.

E puupuu ae anoa, e itiiti a legamea. O lau lea faaupuga ma le faauigaga o lenei Tulafono Tau Faaofi. Ou te faafetai ai i le Malo, o lea ua tatou laa i le laa muamua. O isi mea ia e atugalua ai le Maota, ia tatou te faufau malie lava ma agai mai. E avea foi lenei avanoa leaga o lea ua saia fua le maaveave le fua e ala i le Afaigaluega a le Atua, e le o auai mai latou i i, ae o le tatou tiute lea o le Maota e puipui ia i latou. E faamalulu atu ai foi i le faafofogaaga, leaga o le Afaigaluega Paia ua tofia e le Atua e faauuina. E pei ona malie i saunoaga, e le o se tiute lena a tatou le faamasino, o le tiute lena a le Atua.

Ae i ai nai mea i o le Teuteronomie 28, e i ai faamanuiaga a le Atua e ave i le nuu e talitonu i le Atua. Na fai mai laia, e tele ia o faamanuiaga matagofie, o oe o le ulu e le o oe o le siusiu. E te manuia, e te manuia i lou alu i fafo, e te manuia i lou sau i totonu. E manuia lau taga, e manuia lau ato. Ae i ai la tua o le isi itu o le tupe, pe a e aloese mai i le Atua, e te malaia i le aai, e te malaia i le fanua. E malaia mea e tago i ai ou lima, e malaia mea uma. O uiga na e aliae mai, i le atunuu e fultua i le Atua.

O le mea lea e taua ai ia te aua le tuu i ai o le mea lea, o le tatou tautinoga lea i le Atua, e tasi lava le Faavae e Faavae ai Samoa. O taeao foi ia o le Talalelei na toai taunuu i laufanua o Samoa lea e sapi ai. E tasi lava le mala lea ua ou tau vaai i ai, e i ai le mala lena e i le Teuteronomie lava lena, mo le alienation. Fai mai e te lua mau ma le tagata ese, ae uma ifo ua e nono mai i le tagata ese. Ua sau le tagata ese pule ia oe, se i tau vaavaai o lea ua pei ua vaai atu ua tau agai mai. Ua omai tagata ese ua tau pulea le atunuu, ua avea, ua nono i ai le atunuu. O mea la lea, a toe faasaga sao le sa o le tatou atunuu i le Alii, e toe to faamanuiaga ia mo tatou. Ioe, o le isi mea, o le Atua lea tatou te talitonu i ai, o le Atua o le Tusi Paia, o le Atua o Isaraelu. Ou te fautuaina foi le tatou Malo, o a mea e agai ia Isaraelu, ia lagolago e le Malo lenei, ia lagolago e tatou leaga o le Atua lena, o le Atua lena o lea e Faavae i ai, o le Atua o le Tusi Paia.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

A tatou o lava i mataupu ma Mataupu Silisili, ia o le Atua o Aperaamo, Isaako ma Iakopo, lea e sau ai lava lona gafa e tau ia Iesu, lea e talitonu ai tatou. O le mea foi lea e tau poia tatou i nisi o faafitauli i isi taimi, i te i ua tatou sese ese mai le moa o le ala. Faafetai i le Malo, mo lenei suiga matagofie, ia faamanuia mai le Atua i le tatou atunuu, i le suafa o Iesu, Amene ma Amene.

FOFOGA FETALAI: Faafetai, ia faatumu pea le utu a le aposetolo aua le finagalo o le Atua i le upu folafola, faafetai. Ia se i tulai mai le sui usufono mo Aiga i le Tai, masalo toe o leí ia ona sosoo ai lea ma Aleipata Itupa i Luga. Ia lelei, o lea ua maua atu le sui usufono.

Susuga MULIPOLA LEIATAUA LAKI: Soifua manuia i lau Afioga i le Fofoga Fetalai, lagi matafi i lau Afioga i le Taitai o le Malo, le Kapeneta ma le Palemene, ia faapea foi i le Maota nei.

E manatu o lea ua ifo i tiaseu le lupelele malie i fetalaiga ma saunoaga o le taeao, le taeao manino ma le taeao totoa. O lea foi ua faaifo manu o le Tuasivi sa saili le mafua o le taeao na tamosi o le fogatai, i le saunoaga ma le fetalaiga malamalama i lau Susuga i le Palemia. O lea foi ua manino au o fala i le mataupu e pei ona folasia i lumamaota ma ua tapisa ai nei le taeao, o le fesili e mafua i se a?

O le tofa na ae i le Afioga i le Palemia faapea le Malo aua le silasila mamao, aua o nei e afaina ai taeao. Ou te tulai ma le agaga faaaloalo aua o lea foi ua tupu matagi i liu o vaa e pei o upu e fai i le vaa o Tagaloaalagi, ua logo foi i tino matagi lelei. Faafetai i le Malo i le tofa ua ae, a o se fautautaga poto, aua o le mea moni, e peiseai o seí tulou foi le gagana, ua na o se fale foi lea sa valivali mai fafo, ia ae faaletonu totonu. Peitai o lenei taeao o lea ua manino i le faafofoga a le Maota aemaise Samoa, ia o lea ua tuu i totonu o le anofale, faamausali ma faamautu le Tulafono Tau Faaofi. O lea foi la ua fofoga le Maota ma lau Afioga i folasaga o lenei taeao, se ua taliga e fia logo le mauga o Matautia. E malie i le faalogologo lenei taeao i saunoaga, aua o le mea moni, o le aa ma le autu lea o le tatou atunuu aemaise o le Maota leni o lea e faafofoga Samoa, aemaise le lagolago e selau pasene le lagolago a Aiga i le Tai aemaise foi e le o toe po malae leaga o lea e tulai atu o Faleu ma Utuagiagi na sunui ai alafale o le taeao, lea tou te tapisa ai i taeao ia Paulo ma Setefano ma le toatele o failauga, faamalo. A o le agaga lava, maumau pe ana teuteu i nai Teuteuga laiti e pei ona maua i nisi o tootoo. Ae fia fesoasoani atu i le tootoo muamua, manaia le mau lea faapea e define mai Iesu Keriso. O lona faaletonu, e le o uma ona define mai e le sui usufono lea. Na ona fesoasoani atu, o Iesu Keriso na maliu ma faalavaau ona toetu mai lea, gata ai ai i ina. Ioe, e le i gata i le toetu, leaga e i ai le Iesu na maliu toe tu, ae o le Iesu lea tatou te tapuai i ai, e le gata ina toe tu ona afio ae o lo o nofo i le itu taumatau o le Atua le Tama o lo o fautua mo oe ma au. O le isi fesoasoani tele lena mo isi failauga ia e le o uma mai a latou mataupu silisili i le taeao.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

A o le sui usufono mo Palauli le Falefa, malo, ua ou seua lava lau lauga ou te iloa ua afu, ioe, ua ou vaai atu foi ua amata ona tutulu le itu lea. O le ala lena o lou faalavelave atu ne i faoa i le ta lou finagalo, a o la e tumau lava le malosi o le ta itumalo.

Ia faamanuia le Atua i le mataupu o lenei taeao, maua se tofa aua le talanoaina o lenei mataupu. Ma le agaga faaaloalo, manuia le Fono.

FOFOGA FETALAI: Malo faafetai. Masalo toe lua sui usufono ia e saunoa, oi toe tolu.

Ia se i tuu atu la le avanoa lenei i le sui usufono mo Vaimauga Sasae.

Afioga SULAMANAIA FETAIAI TAUILILI TUIVASA (Vaimauga Sasae): Faafetai i lau Afioga i le Fofoga Fetalai ma le paia o lenei Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai o se mea lava foi lele e taua tele ona o lea e tusi ma talanoa i amio. E mafai ona aumai lona igoa tau mai lana ekalesia pe sa fai sona alofa?

FOFOGA FETALAI: E pei e manaia foi le finagalo aua o le isi e mamafa lava iinei le sausu ae le iloa po o fai sana monotaga faalelotu. Ae faapuupu mai le sui usufono leaga e tele sui usufono ia e fia saunoa i le mataupu lava lea e tasi.

Afioga SULAMANAIA FETAIAI TAUILILI TUIVASA: O le tulaga i le mataupu foi ua opea nei i le Maota, e le fia nofonofa foi lenei usugafono i le taua ma le matagofie foi o le mataupu tuuina mai.

E muamua ona ou faafetai i le Afioga i le Palemia i le tulaga o le tofamamao ma le tofamanino ma le toa foi ua faatautai ai ma tuuina mai lenei Teuteuga o le Faavae i totonu o le Laulau a Fono nei. A maitau atu i le tele o suiga ua i ai e pei foi o le mataupu faatoa tuana'i atu sa tuuina atu ma ua toe tuuina mai i le Loia Sili, e maofa lava le man atu o lenei usugafono ona o le faauuga a le Atua e ala i le Afioga i le Palemia, o lea ua oo foi i le Faavae, viia le Atua.

E lagolagoina e le sui usufono mo Vaimauga Sasae le tulaga ua faataatia mai ai le Faavae ua i ai nei, ae pau lava le tulaga ta te fia avatu ai sota manatu, ou te faafetai foi i le Palemia ona o lea e le o paia lava le tulaga i le Vaega lea 11, o lo o tuuina mai ai le saolotoga i Ekalesia. O lenei foi tulaga ma le maitau atu i lenei taeao, e maofa lava le sui usufono i le taitaiga o le Malo e pei ona ou fai atu i le faauuga lea e tuu mai i le tatou Tama i le tele o suiga. Ae ou te faafetai lava au i lou sui usufono ua ou i ai i lenei vaitau, a o lea faatoa tuu i totonu o le tatou Faavae le mea o lo o tatou mitamita ai. O le atunuu lenei o Samoa o se atunuu kerisiano e faavae i le Atua, ae a matau atu i le upu lea o le kerisiano, o le chrsitian is a not a part time job, its a full time job. \

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

O lea foi e maitau atu i nisi o tatou sui usufono, na ona tatou talanoa lava i le kerisiano, ae o le tele o tatou faatoa oo lava i le taimi o le a lata le vaivaa faatoa o i totonu o Ekalesia. A o tatou foi faataitaiga ia e le o ola ai. E pei la o lou agaga lena i le upu kerisiano, e te olaina i aso uma lava, i lau amio, o lau savali, o lau tu o lau tautala, e atagia ai lava oe.

Na pau lava le faaopoopoga o lo o i totonu e talia ai e le sui usufono mo Vaimauga Sasae le Teuteuga, o Samoa o se atunuu e faavae i le Atua kerisiano, le Atua, le Tama, le Alo ma le Agaga Paia. Na pau lava le talosaga a le sui usufono mo Vaimauga Sasae, a tuu loa i ai ma le Amene, ia ua atoa loa le Teuteuga lenei, aua e le o i ai le Amene. O le Amene, ua uma mea uma i le Atua, aua e leai foi se isi e toe teuteuina le Faavae lenei mo le agai i luma, ae a leai se Amene, o lona uiga o la e tuusaunua lava e toe omai foi nisi Faigamalo toe tasui i nisi foi ekalesia le kerisiano. E pei la o le tatalo a le Vaimauga, tuu loa i ai le Amene, ua mausali loa ma atoa le Teuteuga. Ua talia ma le faaaloalo..

FOFOGA FETALAI: Malo faafetai. Manaia le finagalo o le sui usufono. Ia se i tulai mai le sui usufono mo Aleipata Itupa i Lalo.

Afioga TAFUA MALUELUE TAFUA (Aleipata Itupa i Lalo): Faafetai lava i lau Afioga i le Fofoga Fetalai. Ia e puupuu lava se manatu. E faatulou atu i le paia o le Maota, ua api le uli ua leva foi ona tatou talanoaina lenei mataupu ae puupuu lava le suiga lea e i ai.

O le mea muamua lava e faailoa atu i lau Afioga i le Fofoga Fetalai, o le saunoaga a le ona le Tulafono e faapea ua leva ona tatou olegia le Alii, o lona uiga la o tatou tatalo ia sa fai o lea e opeopea i luga o le ceiling o le fale lenei. Lau Afioga ma le faaaloalo, e atagia lava le tatou suiga lenei i a tatou sauniga i so o se mea e fai a le tatou Malo, e muamua lava faatino i le tatalo. O nei foi i le taeao ua maua ai foi se manatu, o le tele ia o failauga faifeau lea e i le tatou Palemene, e le gata i lea, ae ua i ai foi ma historian. Ua faalogologo ma le totoa i le saunoaga a le faaaloaloga, ua ta i tua le mea a le tamaloa i le 4,000 tausaga talu ai. Ae ui i lea, lau Afioga i le Fofoga Fetalai ua ou tulai atu e tasi lava le manatu ua leva ona ou nofonofo ma au, o lea e fai mai le faa-Peretania i le suiga lea e i ai, o lea o le a sui tatou. Samoa is a christian nation to declare the dominance of christianity in Samoa. A o le faa-Samoa, e faailoa manino ai le tamauina o le talitonuga faa-kerisiano i totonu.

O lau la talosaga ma le faaaloalo i lau Afioga e ona le Tulafono Tau Faaofi, pe taatia foi i le taimi e iloilo ai e le Komiti, pe faamata e le talafeagai faapea, o Samoa o se atunuu kerisiano e faaailoa manino ai le fulisia o le talitonuga faakerisiano i totonu o Samoa.

E pei o nai manatu ia lau Afioga i le Fofoga Fetalai e fia faailoa atu, a o le agaga o le Tulafono e matua lagolagoina e lou sui usufono. Ma lou faaaloalo.

FOFOGA FETALAI: Faafetai.. Ia o le saunoaga faaii o le Afioga i le sui usufono mo Falealupo.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

Afioga Hon AEAU PENIAMINA LEAVAISEETA (Falealupo): Lau Afioga i le Fofoga Fetalai, i le ava e tatau ai ou te tulai ai i le pau o le Palemene, faafetai ua faalogologo totoa i le tele o manatu taua e tusa ai ma lenei Tulafono Tau Faaofi. Lau Afioga, e puupuu lava, ua ou tulai atu ona o le tatou Faavae, God is Father o Samoa, E Faavae i le Atua a o lea la ua tatou faaitaitai faapea o Samoa o le atunuu kerisiano e Faavae i le Atua le Tama, le Alo ma le Agaga Paia. O lou lava manatu, e otometi foi lele, o le Atua le Tama, le Alo ma le Agaga Paia. Na o se fesili foi lele, is it really necessary? Toe fai se tatou mea faapea, o Samoa o se atunuu e Faavae i le Atua, e otometi lava, le Atua le Tama, le Alo ma le Agaga Paia. Na o se manatu lau Afioga. Faafetai lava.

FOFOGA FETALAI: Malo. Ia, tulai maia le saunoaga mulimuli a le sui usufono mo Vaisigano Nu. 2.

Afioga TAPULESATELE MAUTENI TAMASONE METULI II ESERA (Vaisigano Nu.2): Faafetai i le avanoa mulimuli ua e tuuina mai lau Afioga i le Fofoga Fetalai. E muamua ona avatu lau faafetai i le Palemia ma lenei Itu o le Malu i le Kapeneta ma Minisita Lagolago aemaise foi lenei Itu i le agaia o le Malo i tulaga uma i felafolafoaiga i totonu o le Maota nei.

O se manatu i le teuteuina o lenei Tulafono Tau Faaofi, e i ai lou talitonuga ma lou lava iloa toatasi e mafua ai lau faafetai mo le tulaga ua faatinoina. E i ai le manatu o le Teuteuga lea ua faatinoina, e tusa o le faamautuina atili o le vaega lea o le Tulafono Tau Faaofi. E pei la o le faafetai tele lenei i le Palemia ma le taitaiga. O le talitonuga lava ia e le o alu tele se manatu e faapea foi lele o le faaupuga lea ua i ai i le tele o finagalo lea ua faaalua, e pei e foliga foi lele i manatu ia e toe faaopopo nisi fuaitau po o nisi upu i ai, po o aiaiga foi. O le faaoga faatasi o le 11 lea e taua ai le saolotoga i lotu faatasi ma le Teuteuga lea, ou te faaupuu lava o le faamautuina ua agavaa lava le Teuteuga lea ua i ai. E i ai foi le talitonuga e le i faapea o se mea e fou le finagalo lea o le Palemia ma le Faigamalo. E leai, e manatu lava e so o se mea lava faapenei e aumai totonu o le Maota, ua uma ona soalaupule lelei e mafua ai lenei tulaga ma le Teuteuga. Ou te taua lava e au o le tulaga lea ua i ai e faamautu atili ai. Aua a ou faalogologo foi i le tele o finagalo ia e faaalua, e pei e tofua lava ma le finagalo i le taumafai e faamalamalama mai lea ituaiga lotu ma lea ituaiga lotu. E pei e le o gatasi foi o latou finagalo po o le a tonu le sao o lea vaega, ae i ai lava le talitonuga e pei o le tulaga o mea i totonu o le Maota nei, o lea e i ai le tulaga lea e agai i le Komiti. Ma o i o le a maua ai le avanoa mo faifeau, po o taitai moni o Ekalesia, ae taatia ia aita o Ekalesia faaitaitai lea e pei ua tele ai finagalo foi ua faaalua i totonu o le Maota nei.

Ma e faapuupuu atu ai se manatu ona o le tulaga mulimuli ma le manatu mulimuli lea, e leai e lagolagoina e lenei sui usufono le faamautuina o le Tulafono Tau Faaofi i lona tulaga o i ai. E le o i ai foi se manatu i le Vaega 11 lea o lea ua atili mautu ai i le vaega lea o le Tulafono Tau Faaofi. Ma lou faaloalo lava lau Afioga i le Taitaifono.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

FOFOGA FETALAI: Malo faafetai. Ona o lea e matau atu o lo o tulai mai sui usufono ia e toalua o Palauli Sasae faapea foi Faleata Sasae. E ui lava ona o se manatu o le Nofoa e faateleai le tatou galuega e fua i tatou itula faigaluega, ae leaga o aiatatau a sui usufono. O le mea la lea ia alolofa sui usufono ou te tatalo atu ma le agaga, ia faapuupuu mai o oulua finagalo.

Tulai mai le sui usufono mo Palauli Sasae.

Afioga TUIFAASISINA MISA LISATI LELEISUAO PALEMENE (Palauli Sasae): Lau Afioga i le Fofoga Fetalai faapea sui usufono uma o le mamalu o le Fonousu a Samoa, tainane Samoa o faafogafoga tapuai mai, ou te tulai atu e fai se sao o Palauli Sasae i le suiga o le Faavae e pei ona opea i luga o le Laulau a Fono. O le tofa molimoli foi lea i le paia ia Faasisina ma Sa Lilomaiava ma le Levaleva ia Safaleletaua ma Palauli na potopoto, ma oe o le uluai Pule. Ia lou itumalo pele, faamalo folau manuia, tapuai maia ae se i lalafa le tatou upega aua le sailiga manuia a Samoa.

E momoli atu le faafetai a Palauli Sasae i lau Afioga i le Palemia, malo mataala malo le sialsila mamao. Lau Afioga i le Fofoga Fetalai, e i ai le upu faa-Samoa, e fua le kupa i le tai kupa, e sa i liu le u i le tologa ae fana le manu i le aufueta. O lona uiga e fua le gaoioiga i le mea e tulai mai lea taimi i lea taimi. Fai mai foi le Taitai tautaua o Farani o Napoleone, a uma ona fua le fili, ona fua lea o le malae ma le au. O le mea moni, e leai se mea e tupu fua, e faaosofia mafaufauga i mea e tulai mai. Faafetai ua tagofia lenei mataupu i lenei Paeaiaga, o lo tatou tiute e puipui le tatou atunuu mai faiga tatou te le i mafaufauina. A o le faasilisili o le lagolagoina o le tapu, na o tapuaiga kerisiano e faataga i Samoa. O lo tatou ava foi lea ma lo tatou faaaloalo i le Atua e toatasi. Ou te taofi e le o se ava i le Atua le taulagi e faavae Samoa i le Atua, ae tatou tatala le avanoa e ofi mai ai isi tapuaiga e feteenai ma le tatou talitonuga faakerisiano.

Lau Afioga i le Fofoga Fetalai, e matua lagolagoina e lenei itumalo o Palauli Sasae le Teuteuga e pei ona opea i le Maota. Faafetai mo lou avanoa.

Soifua ma ia manuia.

FOFOGA FETALAI: Malo faafetai, e le tau laei atu. Tulai mai le sui usufono mo Faleata Sasae.

Afioga SALAUSA JOHN AH CHING (Faleata Sasae): Faafetai i le Fofoga Fetalai mo lenei avanoa. E faatalofa atu foi i le paia o le Fono Aoa o Samoa ua potopoto. Ona o matou e ona le Tulafono Tau Faaofi. O nai manatu la e avatu, ona e manatu e lagolago ai le suiga. Ona o le isi sitepu lea o le a sosoo nei, o lea o le a alu atu i le Komiti ona gasolo lea i ai o le Palemene foi, faapea foi le atunuu mo le faaaliga o ni o latou manatu. O le ala la o lou tulai atu, o nai manatu foi nei e faatupu manatu, i le faafogafoga mai a le atunuu ma lenei Tulafono Tau Faaofi.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

O le mea aupito sili ona faateia ai lou sui usufono, ina ua aumai le Teuteuga lenei, e faapea lava au o la e i ai i totonu o le Faavae, ae o le mea lenei ua leva ona tatou pepese mai ai mai le amataga. O lona e tuu mai le faailoilo i luga i ina lau Afioga i le Fofoga Fetalai, ðE faavae i le Atua Samoa.ö Ae faitau atu i totonu o le Faavae, e pau lava le faamatalaga o le igoa ma le faamatalaga o Samoa. O Samoa o le atunuu Tutoatasi, o lona lua o le Kelope la o lo o tu ai Samoa, pau lava lea. E leai lava ma se isi mea o taua ai le Faavae o Samoa. O le mea la lona, ua pei ua agatonu ai le mea lea ua tatou faia nei i le Faavae o Samoa. Manaia foi le faatulagaga mai, ðO Samoa e Faavae i le Atua. le Atua le Tama, le Atua le Alo ma le Atua le Agaga Paia.ö Aua a tatou mafaufau atu i le taunuu mai o le lotu iinei i Samoa, e faapena. Muamua, o le Tasi Tolu Paia, sau le lona lua o le Tasi Tolu Paia, sau le lona tolu o le Tasi Tolu Paia. O le isi lona vaega e faamautu ai foi lona fuafuaga.

O le mea la e manaia ai, o lea foi ua toe faitau atu, e na o le faavae lava o le Faavae lea e taua mai ai le faakerisiano ae e leai ma se mea i totonu. O le definition po o le faamautuina o le talaaga o Samoa, masalo o lea faatoa tatou faamautuina nei. O nai manatu na e lagolago atu ai i le Tulafono Tau Faaofi lenei mai Faleata Sasae. Manuia tele le tatou Fono.

O le isi mea i lau Afioga, e leai se mea e popole ai i nisi o Ekalesia aemaise tagatanuu o Samoa. Aua ua faapea nisi ai nei o le a faatapulaa ma saisaitia tagata lotu, ae o lea e manino i le vaega 11, o lo o i ai lava le saolotga e alu ai le tagata ia, po o fea le tapuaiga e agai i ai, e le o taofiofia. O i ina lea e manaia ai le faatulagaga o le tatou Tulafono Tau Faaofi. Ia manuia le Fono.

FOFOGA FETALAI: Faafetai. Na o se mea e fia faasao ina ia aua ne i limataitaiseseina le matau mai ma le faafofoga tapuai mai a Samoa. O le Teuteuga, ðO Samoa o se atunuu kerisiano e faavae i le Atua le Tama, le Alo ma le Agaga Paia, ae le o le Atua le Tama, le Atua le Alo, le Atua le Agaga Paia. Leaga e i ai le eseesega o mea na i le faitau mai a le tapuaiga a Samoa. O le faasaoga lona.

Lau Afioga i le Palemia tulai maia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Faafetai i lau Afioga i le Fofoga Fetalai, faapea foi le mamalu o le Maota nei i saunoaga ma finagalo faaalua i le Teuteuga lenei.

Ma o le Teuteuga e pei ona faalauiloa atu, o le tuu lea i totonu o le autu po o le tino, le aano o le Faavae, ona na o le pau lava upu ia e taua ai kerisiano, o tua mai o le faavae po o le fasipepa lona e tusi ai upu tomua, e le o se vaega o le Faavae. O lona uiga, a oo loa ina lagalaga le Faavae i ni faamasinoga, e na o le pau lava le mea e taua o le tino o le Faavae, ae le faaogaina lava se isi mea i tua mai o le faavae po o upu tomua. O le Teuteuga atoa lava lona.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

E oo foi la i le Teuteuga ma le faaupuga ua avatu i se gagana faigofie, o upu na o le a ave i o i le Komiti, ona valaau ai lea o le atunuu, ona omai foi lea o le toatele o le aufai mafaufau, faiaoga o le Tusi Paia, o i latou ua maua ia faailoga aupito maoae o le Tusi Paia, e omai foi latou e aumai so latou sao. A o le faapuupuuga lena ua agai i ai le finagalo o le Kapeneta, e manino e leai se mea e toe faamaninoa, e faigofie ona malamalama i ai. E le toe foi lava i tua mafaufauga i le Fono Faavae, a o faatalatalanoa e sui o le atunuu o tatou tuua ua lagomau i tiasa, tatou Taitai, e faatalanoa aiaiga o le tatou talia, o le talia e le Malo Afaatasi o le finagalo o Samoa ina ia Tutoatasi. O i le isi vaega aupito maoae ona taua, o i i le finagalo faaalua o tatou Taitai, e tasi lava le tapuaiga e talia i Samoa. Semanu e lata mai le aau lele i le mea e ato i ai le tatou Tutoatasi, pe ana tatou taumafai pea i le tulaga lena, ona i le taimi lena, e tele atu atunuu o le lalolagi o lo o tapuai i isi foi tapuaiga ua fia afe ma afe tausaga, e matutua atu i lo le tapuaiga kerisiano. E i ai le Ekalesia Hindu, e i ai le Ekalesia Budda aemaise ekalesia lea na saunoa atu le sui usufono mo Falelatai ma Samatau. O le Islam lea e pisa ai nei, e fou nei ananafi, e 600TLM, ae na faatu e Moameta i le aai o Mecca, na ia faaaogaina ai le feagaiga tuai. A outou tilotilo foi la i le Quaran o le feagaiga tuai uma lava, lea na faaoga e tusia ai le Quaran ma upu faaopopo.

O le vaega muamua la o le tapuaiga lena, o le vaega e maua le alofa o tagata kerisiano, alofa i tagata kerisiano, tagata Iutaia. O le mafuaaga na fai ai le mafaufauga lena, ona o i lea e tumutumu ai talaiga aemaise lava le talaiga Iutaia, sa teuteu lumafale ai Moameta, ae peitai ane o le taimi tonu lea o lea e sauaina ai foi le ekalesia kerisiano si tamai ekalesia, aemaise le ekalesia Iutaia o lo o latou sauaina, e le gata i totonu o Isaraelu a o fafo mai. O le mea lena na sola ai Moameta i sisifo ma faatu ai lona laumua i Medina. Ona ese loa lea o tusitusiga ua aumai ai manatu la ia e faavae ai le isi lala lea o le ekalesia, a e fasiotia tagata kerisiano ma le Iutaia o lou auala lena i le lagi. O lea la e fanau mai ai le isi lala lea, o tusitusiga na faalelelei. O lona uiga la, e lua ituaiga Islam ia ituaiga lotu ia e i ai nei, e ao ai ona tatou mataitu lena foi ekalesia. Ae ua ou taua le tulaga lena, ona e le i faigofie le tofamamao a o tatou Taitai i le faaiuga na fai ma talia ai loa le Faavae o le Malo o Samoa faaupuga o lo o i ai. Sa ou taua na i ai lava le agaga faapena o toeaia, ia i le tino, a o le tuualalo a latou tusi Faavae, ona o le taimi o lea e tau faatu lo tatou Malo e le faigofie. O le tofamamao la sa i ai a o tatou tuua lea na sao ai tatou i le faaupuga lea lava e i ai i le taimi nei. E pau lava le mea o lea e i ai le misi lea o lo o i ai e le o i totonu o le tino o le tatou Faavae.

I le taimi pe a ma le 2001 i le 2005, sa aumai ai pea le tuualalo a le Fono a Ekalesia ia te au. O le a se finagalo o le Malo ae sui le Faavae ina ia taofia ai isi lotu ia, ua lava ia lotu? Ona ou tapa ai foi lea o fautuaga, ona ou logoina lea, e le faigofie Teuteuga faapenei, aemaise o lea ua tamau i lalo o le Faavae. O le taimi lena e faalelava le majority e mafai ai ona pasia ma teuteu le Faavae i lena foi vaitaimi. Ona alu alu lava lea, fai loa le fono, valaau le fono a le Ekalesia, avatu ai tagata o le Tulafono, e fai a latou tautalaga.

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

E matua malosi finagalo na faaalua e latou o le Tulafono. E le mafai ona... e le tatau ona teuteua le Faavae, ona e i ai mafuaaga tatau ma lavelave e tilotilo foi i ai i le va ma Malo Aafaatasi. Ae le gata i lea, ia tatou nofo manatunatu i le taimi foi na tulai mai ai Iesu ma tau amata lana Ekalesia na o le sefulutolu lava latou. E pei o le papatu le mea lea na fai e Iesu ma Ona ausoo, ae o le a le mea na oo i ai? I le sauaina o Iesu ma Ona soo, lea lava na iu lava i le manumalo o Iesu ma tupu ai le Ekalesia Kerisiano lea ua faitau selau ma selau piliona. Ona tupu ae lea o se manatu, a tatou faia le mea lena, e le iloa po o le isi auale lena e atili tupu ai foi e pei ona tupu le Ekalesia Kerisiano i le taimi o Iesu and after. Ona taoto mai ai lea o le mataupu i le taimi lena. O le isi mea e puipui e le Faavae tagata lotu faatasi ai ma tagata le lolotu, e puipui foi e le tatou Faavae ma i latou e faapaupau. Ona o le tulaga maua o lo o i ai i le Faavae, aua le faimea faapito. Ona alu alu lea, fai loa le iuga a le Kapeneta, o le a fai ia se Komiti Suesue, se i tagofia le vaega lea e lagalaga mai pea e le Fono a Ekalesia, e Taitaifono ai Oka Fauolo. Sa fai le fono i nei fai le fono i Savaii. Na ou nofo lelei ma ou faatalitali ou te faatinoa se fautuaga e aumai e le Fono a Ekalesia. E fai si umi o fai le fono a le Komisi Suesue lea, ae sau le fautuaga aua lava ne i lotea se mea e tasi, o lena lava e lelei le Faavae. O lea la e taoto mai ai nei. O le tausaga lea na tea nei i le Kapeneta tuai, o isi ia iuleo na toe lagalaga mai, se i toe silasila ia mo le puipuga o Samoa mai i ni vesiga mai isi lotu ia pe afai e ulufale mai Samoa. Na laga mai lava e Minisita ma aumai ia te au ma ou mafaufau malie pea i ai, ae o le amataga o le tausaga nei lea sa tupu ae ai loa se manatu i le Kapeneta, atonu ua oo i le taimi e toe tagofia ai, aemaise o le mea lea ua faatoa malamalama i ai le Kapeneta. Na ona tatou laulauvivilu o Samoa o lo o Faavae i le Atua, ae le o le ata lena o lea e i totonu o le Faavae o Samoa. E leai lava se mea e lilo i le silafaga a le Atua. O lea foi tatou te talanoa pea ma tautau le suafa o le Alii, e manino lava Afioga a le Alii, *“Po o se toalua po o se toatolu e tautauina Lona Suafa e lotolotoi ai i totonu.”* O lona uiga, o lea e silasila lava le Alii i lena mea tatou te faia ma soisoi i le l sa o nei lafoga tatou te faia.

O le auau atoa la lena o le Teuteuga lena lea ua tatou valaauina lea ua i ai le agaga e ave i le Komiti, o i latou e silasila totoa i ai po o le faaupuga lea po o se isi lava foi faaupuga e tauave ai pea le atoaga o le mau, mai lava i le amataga o Samoa e Faavae i le Atua, ona toe foi mai ai lea. Ia te au lava ia, e faigofie lava le Teuteuga, ae pei ua tatou toso le laau felefele. Ia o uiga lava ia e taua foi le taimi e faatalatalanoa ai ae o lea tatou te iloa lelei o le Atua le Tama, le Alo, le Agaga Sa po o le Agaga Paia, o le Tolutasi Paia lava lea. E faafia ea ona lui e le ausoo Iesu, matou te fia vaai i lou Tama. Tali Iesu, *“A outou vaai ia te au, ua outou vaai foi i lou Tama, aua ou te i totonu o lou Tama, o lou Tama foi o lo o i totonu ia te au.”* The indivisibility of the Blessed Trinity. E le mafai le mafai ona tuueseese. E faatolu ona pu le lagi, e faatolu lava ona pu le lagi ae fetalai mai le Alii mai luga, *“O lou atalii pele lena.”*

25 IANUARI 2017

**Tulafono Tau Faaofi o Teuteuga o le Faavae (Nu.2) 2016
– faitauga faalua**

E faatolu lava. E le o se mea fou la i o tatou tagata le faitau faitau pea ma malamalama, atonu o lena foi o lea e fai ma apaapa mai ai pea le Atua e faasao Samoa. Na pau lava le mea ta te tau fefe ai, e le iloa po o le mea lea e fai ai ma tau lavea ai tatou, a lea e aumai i le Tusi Sa, “*O le upuvale i le Agaga Paia, e le faamagaloa ana agasala, o le upuvale i le Agaga Paia.*” O le a la le upuvale i le Agaga Paia? O le l talitonu na to Maria e le Agaga Paia fanau mai ai Lona Alo pele e faaola ia i tatou, excetra, excetra, excetra, o le l talitonu i le mea lena, o le agasala lena i le Agaga Paia. O le mea lena o lea ou te popole ai, a outou vaai atu o tau faaletonu mai, ona ou popole lea i ai, leaga o lea e maioio lava le Tusi Paia i le tele o mea, ae i ai le mea lea e tupu, e piki e isi isi mea ae le pikia isi mea.

Fai mai le tamaloa faipisinisi le isi foi tagata o le Ekalesia, a o lea e te manao e aoao mai au i lau Ekalesia, o le a tonu lava lau Ekalesia? O le umi e te tautala mai ai ia te au, o lou tuvaetasi. Ia tu loa i luga lou vae? Ona tu vaetasi loa lea o le toeaina. Fai mai loa lea o le toeaina, ðO lau Ekalesia o le Ekalesia Kerisiano e faavae i le Feagaiga Tuai ma le Feagaiga Fou le talaaga atoa, a o le auau atoa, e mafai ona ou faaupua i le upu e tasi, o le alofa, Feagaiga Tuai, Feagaiga Fou, e tasi lava le upu e faaupua ai le Feagaiga Tuai ma le Feagaiga Fou, o le alofa. O le Feagaiga Tuai e faamatalaina mea e tutupu mai le Feagaiga Fou, a o le auau o le Feagaiga Fou, o le alofa o Iesu na maliu tiga mo i tatou uma na faaola ai le lalolagi.

Lau Afioga i le Fofoga Fetalai, ia o le faaiuga lena o le faamatalaga o le Teuteuga lenei i lenei taeao na liugalua. Soifua ma ia manuia.

FOFOGA FETALAI: Malo faafetai.

Na faamaonia le lafo ma faitauina le Tulafono Tau Faaofi o Teuteuga o le Faavae (Nu.2) 2016 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi o Teuteuga o le Faavae (Nu.2) 2016 i le Komiti o Tulafono Tumau, Mataupu tau Faiga Palota, Talosaga mo Tofiga Faale-Faavae mo le iloiloaina ma toe lipoti mai i le Fono Aoao i le tuanai ai o le 90 aso talu ona tuuina atu le Tulafono Tau Faaofi.

**TULAFONO TAU FAAOFI O TAGATA E SUESUEINA MAFUAAGA
LILO O MALIU 2016 – faitauga faatolu**

Afioga Hon FAAOLESA KATOPAU T. AINUU (Minisita mo Faamasinoaga ma Pulega tau Faamasinoga): Lau Afioga i le Fofoga Fetalai ou te faatu le lafo, *Ina ia aveese le fuainumera 2016 ma suia i le fuainumera 2017 ma faitauina ai le Tulafono Tau Faaofi o Tagata e Suesueina Mafuaaga Lilo o Maliu 2017 i lona faitauga faatolu.*

25 IANUARI 2017

**Tulafono Tau Faaofi o Tagata e Suesueina Mafuaaga Lilo o Malii 2016
– faitauga faatolu**

Faaluaina e le Minisita mo Fesootaiga, Faamatalaga ma Fesootaiga Vavave Faaneionapo, ma le Minisita mo Aoga, Taaloga ma Aganuu.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.

**TULAFONO TAU FAAOFI O TEUTEUGA O LE TULAFONO O
FONO A NUU 2016 – faitauga faatolu**

Tofa Hon FAIMALOTOA KIKA IEMAIMA STOWERS (Minisita mo Tina ma Tamaitai, Atinae o Nuu ma Afioga ma Agafesootai): Lau Afioga i le Fofoga Fetalai ou te faatu le lafo, *Ina ia aveese le fuainumera 2016 ma suia i le fuainumera 2017 ma faitauina ai le Tulafono Tau Faaofi o Teuteuga o le Tulafono o Fono a Nuu 2017 i lona faitauga faatolu.*

Faaluaina e le Minisita mo Aoga, Taaloga ma Aganuu ma le Minisita o Tupe.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.

**TULAFONO TAU FAAOFI O TEUTEUGA O LE TULAFONO O
GALUEGA TAU LEOLEO 2016 – iloiloga auiliili**

FOFOGA FETALAI: E tusa ai ma le Tulafono Tumau 107, e tatau ona faamonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai le Afioga i le Taitaifono o le Komiti o le Vaega tau le Va Fealoai.

Afioga Hon GATOLOAIFAANA AMATAGA ALESANA GIDLOW: Faafetai i lau Afioga i le Fofoga Fetalai. Ma ou te tulai atu ma le faaaloalo e faatu le lafo, *Ina ia faamaonia e lenei Fono Aoa le Lipoti a le Komiti o lo o tuuina atu ai ana fautuaga, Ina ia faagasolo le Tulafono Tau Faaofi o Teuteuga o le Tulafono o Galuega tau Leoleo 2016 faatasi ma Faasaoga.*

Faaluaina e le sui usufono mo Aleipata Itupa i Lalo.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoa le Lipoti a le Komiti o le Vaega tau le Va Fealoai i le Tulafono Tau Faaofi o Teuteuga o le Tulafono o Galuega tau Leoleo 2016.

25 IANUARI 2017

**Tulafono Tau Faaofi o Teuteuga o le Tulafono o Galuega Tau Leoleo
2016 – iloiloga auiliili**

O le a sagai atu loa le Fono Aoa o le iloiloga auiliili o le Tulafono Tau Faaofi o Teuteuga o le Tulafono o Galuega tau Leoleo 2016.

E tusa ai ma le Tulafono Tumau e amata le iloiloga auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le fuaiupu 55.

Faamaonia.

FUAIUPU 3: Ua teuteuina le fuaiupu 56.

Faamaonia.

FUAIUPU 4: Teuteuga

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Galuega tau Leoleo 2016.

FOFOGA FETALAI: O lo o i ai le Faasaoga a le Komiti i le Fuaiupu 1 ma le Igoa. Tulai mai le Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai ou te faatu le Faasaoga i le Fuaiupu 1 e faapea:

“FAASAOGA:

Ia aveese le fuainumera 2016 ma suia i le numera 2017 ma faitauina ai le Igoa o le Tulafono e faapea:

Teuteuga o le Tulafono o Galuega tau Leoleo 2017.”

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o Galuega tau Leoleo 2017 faatasi ma le Faasaoga.

25 IANUARI 2017

LAFO MO LE FAATAATIAESE O TULAFONO TUMAU 108(4)

FOFOGA FETALAI: Ou te tapa lau Afioga i le Palemia mo se lafo.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faataatiaese le Tulafono Tumu 108(4) ina ia avanoa ai le faitauga faatolu o le Tulafono Tau Faaofi lea sa iloilo ina auiliili i le aso Fono leni.*

Faaluaina e le Minisita mo Pisinisi, Alamanuia ma Leipa.

Na faamaonia le lafo ma tulai ai le Tulafono Tumu 108(4) ua faataatiaese.

TULAFONO TAU FAAOFI O TEUTEUGA O LE TULAFONO O GALUEGA TAU LEOLEO 2016 – faitauga faatolu

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega tau Leooleo 2017 i lona faitauga faatolu.*

Faaluaina e le Minisita mo Pisinisi, Alamanuia ma Leipa ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aao Faitulafono.

FOFOGA FETALAI: Ona o lea ua tatou toai taunuu i le siui o le galuega faatulagaina mo leni Aso Fono ou te tapa le Afioga i le Palemia.

LAFO MO LE TOLOPOINA

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia tolopo nei loa Tualumaga a le Fono Aao seia aulia le Aso Lua, 7 Mati 2017 e pei ua uma ona faamaonia.*

Faaluaina e le Sui Palemia ma le Minisita mo le Soifua Maloloina.

Na faamaonia le lafo.

FOFOGA FETALAI: Ae tatou te le i tolopo ou te tapa lau Afioga i le sui usufono mo Alatau Sisifo.

25 IANUARI 2017

Lafo mo le Tolopoina

Afioga ALIIMALEMANU ALOFA TUUAU (Alataua Sisifo): Faafetai mo lou avanoa. Atonu e le i maua mai lou tulai atu ae le i faaiuina a tatou galuega faa-Palemene mo lenei aso.

Lau Afioga i le Fofoga Fetalai ou te tulai atu ma le faaaloalo lava e ala atu i le Nofoa se faamanatu mo le Malo ona e maitauina i le lisi o Lipoti a Komiti Faa-Palemene ua tuuina mai e le Ofisa o le Fono, e 22 Lipoti Faaletausaga na tuuina atu ia Aokuso 2016, e faamanatu atu ai ma le faaaloalo lava e ala atu i le Nofoa le Tulafono Tumau i Iona Vaega 55, e tatau i le Malo ia le silia le 60 aso i le maea ai o le tuuina atu o se Lipoti a se Komiti na tali atu i Lipoti uma a le Komiti.

Faafetai mo lou avanoa.

FOFOGA FETALAI: Malo faafetai. O le mea sili o lea ua uma ona faafofoga le Malo i le faamanatu a le Komiti o Tupe ina ia faapena ona talafeagai ma Tulafono Tumau. O le mea lea afai e ese ai se finagalo o le Malo, o le a faapena ona tuu atu le avanoa.

Tulai mai lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, masalo tasi lea mataupu e moomia ai se feiloaiga i se taimi o lenei vaiaso ina ia matua faamautinoa le ala o mea ona o le tele o Lipoti ua maea, e pei e le o taoto lelei le ala o mea ina ia mafai ai ona aumai uma Lipoti i le taimi o lo o moomia e le Komiti. Masalo o le tulaga lena se i feiloai ai ma le Failautusi o le Matagaluega lenei.

FOFOGA FETALAI: Malo faafetai. Masalo ua manino au o fala e tusa ai o le Taitaifono ma lana faafesili, le Taitaifono o le Komiti o Tupe Maua ma Tupe Totogi. Ia, e momoli atu le faafetai ma le faamalo e tusa ai o le aso, malo le onosai malo le lavapapale, o a foi timaiga ua faapena ona sopo tuaoi ma paopapa i le faafofoga a sui usufono i le isi foi sui usufono, aemaise foi o le tapuaiga faafofoga a Samoa, ia ui magalo ia i le Atua e ui magalo ai se finagalo o le Palemene. O le manatu lava ina ia faapena ona tatou faaogaina le gagana tuusao ma se gagana faigofie ina ia faafaigofie ona malamalama ai se mataupu o lo o tagofia e le Palemene. Samoa, e faalagolago atu lau Palemene i sou finagalo faamagalo.

Ae tatou te le i tolopo e tusa ai o le lafo, ou te tapa le sui usufono mo Falelatai ma Samatau, malie le sui usufono mamalu i le faafuaseia o lau Afioga, e manaia lou tulai mai e faaiu le tatou Fonotaga i se tatalo.

Na tolopo Taualumaga a le Fono Aoao i le itula e 12:44 i le aoauli seia aulia le itula e 9:00 i le taeao o le Aso Lua, 7 o Mati 2017 e tusa ai ma Polokalame o Fonotaga a le Palemene 2017/2018.